

江

西

詩

徵

江西詩徵卷四十

南坡曾煥賓谷編輯

明

梁寅

寅字孟敬新喻人元末辟集慶路儒學訓導明初徵修禮書書成以老疾辭歸結屋石門山學者稱爲梁五經又稱石門先生有石門集

怨歌行

雲母屏風零露涼葡萄錦衾殘月光羞看繡帳雙鴛帶徒費薰衣百和香

寶釵頭上千黃金可憐墮井無復尋情如秋嶺朝朝淡愁

似春江日日深

旅舍

寥闊山林跡淒涼江海情已歌從客好楚服爲人輕把劍  
秋風起憂時白髮生黃金雖所貴未敢論縱橫

次韻酬黎以德

銀河斜界樹叅天爲憶幽人思渺然亥市塵囂迂竹逕午  
橋烟雨榜溪船明燈散帙栖鴉後倚仗看山去鳥邊但得  
文章攀屈宋何須重賦遠遊篇

題印土寺罷釣軒

曲池照林鴟百尺懸蘿陰開軒坐垂釣水清如我心小魚  
易傷生大魚或淵沈投竿爲之惻於此悔悟深名區縻好

爵都市爭黃金但戀鈎餌馨豈知憂患侵濯足南澗流振  
衣北山岑旣羞結網罟何必漑釜鬻物生免相賊嗜欲常  
自禁嘉此古人意託之金石音

擬古

獨處衡門下慨然思九州我馬苦疲怯山川多阻修豐草  
被長坂麋鹿或羣遊蔚彼嘉樹陰鳴禽自相求彼物各有  
適而我何寡儔日月雙車輪恆恐不少畱願與二三友朝  
夕論王猷毋爲自局促窮廬悲白頭

芙蓉在江浦亭亭豔清波雖云出淤泥麗質良可嘉褰裳  
涉枉渚凌風折芳花願言贈君子翫之比瑤華於時苟不  
惜顛顛當奈何

江海處卑下百川皆赴之山木鬱蕭森上竦無繇枝王侯  
稱孤寡惟恐嬰舊危謙虛受衆益天道盈必虧周公下白  
屋吐哺情孜孜孫子相南楚祿豐心愈卑奈何閭閻子往  
往多矜持

昔嘗好名山五嶽期遍歷思見松與喬再拜問仙液微生  
累妻孥常爲飢凍役歎此血肉軀何以生羽翼諒非金石  
同服食竟何益不如安我常百年順所適

雲門輟清響鄭衛音方揚錦衣受垢污不如練布良軒軒  
青雲士鳴玉升廟堂名高受讒毀寵盛懼愆殃美女惡女  
仇偏聽姦以萌衆口能鑠金况乃忘周防所以君子心惟  
用德自將行行九折坂戒哉銜蹙傷

我有太古琴千年妙音續七絃何泠泠聽之非促邈一彈  
文王操再彈宣父曲聖人宛見之何由躡其躅大道日以  
淪澆詭馳衆欲孰思障頽波九州反淳俗夔龍爲股肱巢  
許遜巖谷窮通各有志於我奚不足

簡伯英伯筠見訪雨畱信宿

谿谷雲畫合東林微雨來二友歛俱至一見紆中懷掃我  
茅茨室爲君細帙開上言風雅醇下言豔歌諧何以相淹  
留清醕不盈杯何以爲遠贈媿無瓊與瑰煦風失堅氷谿  
水流潛潛歸鴻正翱翔浮鷺散參差告我遽言旋定省恆  
懼乖懿此孝友心令德善自培願爲王國士無媿北山萊

贊谷作

老樹山橋晝蕭灑興來濯足蒼藤下雲邊厓石危欲落雨  
後泉流急如瀉客過松林貪翠陰濃分稻苗散青把桃源  
風土良可樂何恨龍鍾在田野

贈西僧

高僧自喜巖下住長見白雲飛復廻半山風吹松子落千  
歲石作蓮花開鳥下林堂待分食龍遊溪水過浮杯吳山  
楚山聊暫住還把楞枷歸去來

爲王仲義題雪梅

小橋東郭先生履曲逕西湖處士家向暖早看花似雪冒  
寒更愛雪如花

歸醴溪

久厭都市喧俛思山巖靜歸飲醴溪泉怡我淳樸性神峯  
雜樹擁石門翠厓並蘿懸晨露滋巘秀夕霞映褰裾蔭雲  
松脫屣悅風磴悠然遊客心疊出野人詠方期谷口耕毋  
謂終南逕

爲臨川章則常題山水圖

山擁衡廬青水含瀟湘碧兩厓蟠蛟樹千歲蹲虎石遙遙  
遡川舟汎汎騎驢客憑高者何人閒看楚雲白

采蓮曲

豔妝二八女嬌歌采蓮曲停橈江上郎隔花傷心目采蓮  
莫采花采蓮莫采葉要知心最苦綠房爲君折花多照水  
紅葉多照水青願及秋未老爲花惜芳馨折花折翠莖常



恐輕斷脆但使藕常在年年花相似

大堤曲

大堤女兒顏如花穠妝綺服踏江沙折花鬪草歸來倦小  
樓閒坐彈琵琶玉釵金蟬雲鬟整江水照見花枝影舟中  
少年久凝望如飲春醪昏不醒焉知美人心險若穽與機  
令爾黃金一朝揮魚向深淵藏烏逐層雲飛勸爾慎勿癡  
且惑縱有多金不如歸

飛龍篇

四登空峒如觀五城雲霞垂彩日月互明元鶴繞樹青鹿  
長生翹慕軒皇問道廣成至人不私雲符親授孰爾心田  
室爾情實駕乘風電八表騰驟八寰糠粃長樂元園

楊花白

楊柳花可憐白雪飛暮春文窗翠牖日方永楊花撲撲空  
愁人縈簾復度幕度幕復縈簾向夕春風起愁人愁轉添  
願倩春風一吹去點耶繡衣暫回顧

城中女

娥娥城中女小樓對門家相驕茜裙新竝笑雙鬟斜花窗  
弄鸚鵡月榭彈琵琶不自結衣帶笑人說絲麻越女當自  
羞燕姬何足誇但愁玉顏改眼底生塵沙秋江芙蓉落天  
寒空怨嗟

妾薄命

團圓青天月如燈照九州不將草爲心不假魚爲油照山

見樹石照水見蛟蚪獨不照妾心暗中中夜愁

江南曲

十里江南春漠漠汀洲綠盤迴雲中隼參差沙上鷺遠樹  
紛紜綿浮雲互馳逐楚客滯歸程愁腸日九曲

霍將軍篇

霍將軍甲第閼且雄堂中賓客風生座門外車馬雲連空  
俊采馮子都英姿范明友紫繡袍加火浣衣雕鞍玉間黃  
金縷金吾上將當劍避羽林郎官多擁後一旦九重恩變  
輿封侯悉皆擯棄人何不看取桃李花終讓松柏寒猶春

老將行

小年自託良家子手把兵書當經史出身名隸羽林籍帶

劍橫行過都市一校初蒙上將知三軍盡羨好男兒陰山  
夜寒雪擁甲沙磧晝昏風捲旗鐵驄疾足若飛兔羽箭鳴  
聲如餓鴟獨攻賢王每血戰生擒當戶猶窮迫自矜虓勇  
世無敵九重早未承顏色上功幕府屢可譴獻計轅門多  
阻抑大將軍印別賜人狼居胥山誰勒石鬪雞羞逐少年  
場射虎猶令獵徒惜方今天子重書生朝臨廣內暮承明  
老來不願風塵起但向閭閻觀太平

紫騮馬效楊伯謙

紫騮馬黃金鞭春風十里杏花發  
奴奴鞚馬瓊樓前樓中美人坐  
歎息飛塵一帶出南陌南陌行人如水流  
怕郎騎馬好遠遊

古琴辭

老桐斲成三尺六七絃曾奏雲門曲懸之市肆歲月深酬  
價誰肯千黃金伶官罕識宗廟器市人惟詫秦箏音知音  
既少彈不易常藏匣中傳世世

別鵲操

商陵穆子娶五年無兒親欲其改娶妻聞之夜中  
悲嘯穆子感之而作是

鮮鮮雙白鵲雲中同翱翔樹間竝栖宿寒暑五易雌不生  
雖在彼常情能不改圖雌夜悲雄感吁枯楊尚生稊況乃  
楊未衰春風年年解相待比翼處處長相隨

結襪子

侃侃張廷尉正言驚摯紳結襪重王生謙恭忘怒嗔嗟彼  
一庸士何能佐經綸徒沾下士名焉分琳璵所以魯連  
子辭金寧賤貧高誼服卿相奚論情相親

宿瘤辭

宿瘤女貌媿而心妍星辰之光山岳之氣男兒或虧缺女  
流乃能全木癭爲樽宜貯樂婦癭爲后當輔王初采桑齊  
郭中獲王意入王宮不換舊裙裾不效新儀容嬪嬙見之  
笑後乃化之成肅雍齊廷治齊政舉婦爲臣國之母諸侯  
使客來近郊猶問前時採桑女

三老辭

山客逍遙遊路逢三老翁頭如春雪皓面似朝霞紅豔豔

江陰言集 卷四十一  
覆青梅爛爛明方瞳客問何以壽答客言非同首聽一老  
言金石非佳餌七情莫縱溪壑流五內當完天地氣再聆  
二老言起居出入慎朝昏寒暑調衣饑飽調食邪氣孰得  
而侵予後聆三老言壽元無促防鳩毒至人有訓夜獨宿  
客謝老翁斯言良然古迄今寧有仙命當順受生可延保  
百歲侔千年

題傅賢章贈言集

石泉昔在山雲霞愜真信旣膺票姚寵復思笳鼓競邊隅  
五戎戢冠蓋三五盛懷君難奮飛因風寄巴詠

筠雪坡

結構遠囂市竹生緣崇岡朱夏樂蕭散元冬或徜徉勁風

自北至雨雪歟其勢迢遙蔣生逕良友懷求辛稍混琅玕  
色煥發蟻珠光猗猗歌衛風漣漣懷雅章慎保歲衆操翹  
企需春陽

清暉樓詩爲周仲謹題

渝川古名邑山水多清奇鼎峯實高聳雲岑復蔽虧碧澗  
橫素練虎瞰流寒漪周君志高尚築樓臨水湄登覽寄幽  
興藏修際明時遠覽豈有極曠視應無涯涼飈生坐席明  
月侵臥幃賓朋日交集琴尊樂娛嬉方寸長澹若修省實  
自持流傳太極圖歌詠康樂詩地迴景逾靜心閒神自怡  
夜氣凝沆瀣曉色延熹微遺躅後世仰高風古人期繩繩  
世德舊煜煜芳名垂



擬古

出門望長道車馬何喧闐白日殷輕雷飛塵若爲烟周人  
好商賈錐刀爭貿遷趙女誇綺服踏蹤彈鳴絃營營苦不  
足衣食思華鮮奔濤日東注何由爲靜淵

南州產嘉橘朱實日光炫燕晉誇棗栗連林極豐羨棗栗  
充餽糧足以饑餒咽橘酸良不如亦可籩豆薦踰淮或成  
枳性移貴反賤賢哉鍾儀子土風慎不變

名都少年子金多矜富強連雲起甲第峨峨擬侯王外廐  
駢騏驥侍女羅姬姜豪貴相經過綺席飛霞觴醉言氣凌  
人歡樂殊未央嘲笑東鄰士晏食唯糟糠豔豔桃李花隨  
時逞妍芳豈知易零落榮華安可常

鳳棲必孤桐鶴集思高松飛翔擇所止差與鵲鷦同跼跼  
賤貧士混混常俗中節概曾閤賢言語班揚工被服常布  
褐虛室生蒿蕪自非賢哲舉何以樹勲庸

時違骨肉棄位高仇怨親離合心豈常勢利情所因君子  
嗟薄俗古風恐夷泯深知慕管鮑輕怨羞張陳蕙荃不隨  
化球琳豈易磷結交英雄士白首當如新

驅馬出東郭松林見高墳云是公侯葬華表千層雲歲月  
既已遠朽石生荆榛虺蛇或內蟄狐狸當晝蹲芻兒歌其  
上死者寧復聞感此長太息浮生若飈塵惟當勗令德千  
載逝猶存

歸息

歸息蒙嶺陽聊比嵩少岑樂此林藪趣遂忘江海心沿澗  
寒芳藹入谷聽幽禽流泉響松下潺湲非俗音綺蘭被徑  
晚香氣襲衣襟頽景勿西匿浮雲夕以陰睠彼羣飛鳥翩  
翩投北林

藹藹巖前樹翠葉敷鮮滋攢葩雜丹素條蔓相因依豐草  
覆衡側麋鹿或羣隨石潭見遊鯈翫之往復來念昔困樞  
紲山澤心每違傍巖葺茅茨庶使夙願諧黃綺各有志潛  
然何是非

春陽旣和煦時雨亦霑濡原野綠已遍上澗含膏腴兵戈  
幸少戢良農日墾鋤戴勝鳴桑根題鵠亦交呼嗟我理編  
簡四體忘勤劬羔裘愧逍遙梁鵲恥安居素餐古所誚耦

耕良我徒

暇日過吟峯北宅吳僉子亮寶藝齋偶賦

長安繁華子錦綺爲衣裾千金歐冶劍百金大秦珠腰帶  
玉麒麟馬鞭青珊瑚鬬雞杜陵曲走馬黃山隅一朝歛自  
厭謝遣輕儇徒出市賣駿馬下帷事詩書落筆慕班揚開  
口論唐虞旣膺丞相薦詔徵諸公車三十秘書郎四十諫  
大夫不登金張門掉臂許史廬結知萬乘主入侍九重居  
里閭共嗟歎金玉竟何須六藝信爲寶少年毋自疎

白邵城歸豐溪寄劉仲修

大川日瀾瀾孤旅何嫫嫫憶與君子別嚴霜已再更方春  
有行役兼旬滯荒城文史貴探討朋儔庶合併中野見流

鴻灌木聽鳴鶯逍遙煦風至臨眺滄波明伊人獨難期方  
舟阻遐征我亦懷空谷靈雨促僮耕悵望東南雲聊寫憂  
思情

林下

客尋林下居逕幽不待掃疎篁延柔蔓殘果落深草禽言  
人莫知虎跡僮驚報何事櫻余懷甕牖悟天道

感物

元化均陶冶生物分娘妍柏陵樗間雜竹林蔓紫纏妖葩  
垢蘭蕙惡羽憎鸞鶴迫窄致憔悴搏噬堪愍憐君子志易  
俗心想無爲先三光顯恆明六氣庶不偏仰視天高遠網  
疎竟何言覆盆日莫照橫波隄苦難雲解晦當霽永液凍

同暄何用多憤嘆安常理固然

懷仙詩

峩峩崆峒山渺渺天西北瑤臺殊人世鬱藍若咫尺嗟哉  
廣成子于焉養恬默冥冥黜視聽窅窅寧氣息筋力弱可  
強鬢髮自能黑元門入無窮遐表遊無極道參日月光燭  
幽何薄蝕旣枉軒轅駕垂裳賴贊廸斯人吾所慕望望古  
今隔

華齡王子晉萬祿一毫輕離凡期鶴駕吹笙爲鳳鳴朝辭  
九重闕夕出五雲京西去憩元圃東遊戲赤城倥傯乃其  
壽奚但侔錢鏐來歸緱嶺上聞者紛相迎溷濁羞戀戀耻  
糠何營營舉手謝時人翩然復遐征

昔聞河上公結廬俯黃流榮華若霞彩休氣兼雲浮坐閱  
寒變暑靜觀春復秋師事五千言探索窮微幽文星紹炎  
祚元默思躬修無爲跂上德守雌乃嶽猷問道服要言至  
人疇與侔駕風歛然去渡海還丹邱形影不可見姓名焉  
足留

得道黃初平白號赤松子金華翠峯巖雲中樂居止牧羊  
羊亦仙叱石石能起見往從之遊谷神同不死松脂比金  
膏茯苓若麟髓扶桑丹萐甘元州白柰美無嫌服食殊固  
命同一軌

崑崙古時雪瑤水天上波云茲金母宅玉樓高嵯峨曾留  
穆天子宴酣觴赤霞天寒滯八駿黃竹發悲歌後來感漢

皇七夕降承華仙果進蟠桃法曲奏雲和醪酌翠瓊液麟脯紫河車三山雖綿邈爲樂何其多

羅浮古仙境葛洪棲其間抱樸著奇書金丹駐童顏又聞陶隱居闕蹤句曲山靈砂雪霜色蕭帝重神完若人俱壽考方蓬孰躋攀血氣均潤澤肉軀無羽翰百齡可順保千秋諒爲難真人敝天地言夸徒永嘆

題山水圖

山共遙天青溪映深樹綠松逕兩幽人石龕一茅屋誰知滄海叟垂綸立於獨

雨後登閣

山雨生暮涼發興陟西閣漾漾月窺櫺晶晶雲赴壑桃笙



屏竹坐蘭階  
鉤簾酌無愁  
明日陰且盡  
今宵樂

夏曉

雨歇曙雲涼  
命童耕烟草  
貪睡人起遲  
無憂鳥啼早  
土膏長  
麻菽澗流沃  
秔稻樂此巖  
下居時康  
慰衰老

題孔克仁所藏先世平仲官誥

王府珍天球  
侯邦重彤弓  
矧惟綸綍命  
因茲念前庸  
懿哉宣尼裔  
條支遠以豐  
烈烈稱良臣  
侃侃見孤忠  
著作署御冰  
制辭洒皇風  
鸞鵲紋彷彿  
鴻龍蟄蜚翬  
流光前人德  
循軌後人同  
未羨齊稷下  
惟懷魯淹中  
眷眷手載心  
令德期增崇

贈吳孟任

君不見漢時定遠侯恥事筆硯心雄豪赤手能扼崑山虎  
釣竿竟掣清海鰲吳郎讀書思世用縱談王霸誼甚高旁  
窺風雅及楚騷酒酣氣欲隘八極有時拔劍起舞白日風  
蕭颺亘空虹霓歘而見深谷颺颺爲之逃一身膽氣山峯  
聳律英姿何必頭虎毛時時過我論六韜後生可畏心所褒  
驍驍豈憚踏冰雪鷹隼早見辭籠絛臯夔稷契日已遠達  
官肉食多滯饗焉知吳郎心激烈褐衣在野輕爾曹我常  
愛君如寶刀用之有時慎所操丈夫事業非徒勞

皆山樓歌爲黃富巖氏咏

我聞仙人十二樓乃在白雲之島丹霞之洲君家結樓在  
人世何爲亦戀山巖幽山中紫芝亦可茹亦有白石可煮

爲珍饈八窗何玲瓏七星挂簷頭翩翩元鶴度甡甡蒼鹿  
遊千丈松關來達颺萬年石上鳴寒流憑高聽此不知倦  
足以滌蕩人間之閒愁君家渝水南吾廬相望不百里山  
樓幾世凡幾年今重構之良有以昔聞飛甍爲瓦礫瓦礫  
再見飛甍起玉堂學士記早成南郊先生詩更美日延賓  
客喜多暇誦文歌詩夜未已有時鉤簾嵐翠入舉觴談詠  
煙霞裏嘈嘈天籟悅心耳石爲豆登泉作醴樓上朝復朝  
山中年復年隱居之樂何陶然金丹可遇不可求遣情以  
酒亦得仙春岡花草可玩惜秋林風月宜招延心常愛此  
樓外之皆山千峯萬壑森後先醉翁之樂樂無邊山中之  
人相與長周旋

次韻酬習君謙

新時金玉響泠然喜聽琴中幽澗泉臥病獐獐青嶂下開  
懷鸞鳳碧梧邊拋書懷望秋風逕倚杖踟躕夕照天最憶  
習池山水勝故家人物信多賢

墨溪橋歌

黃花之高峯削玉凌青霄墨溪如苔峽曲折架以蟠螭百  
尺之飛橋乃有逸人張與黃結廬其側相與放曠而逍遙  
園綺非陋漢巢由豈致堯吾但愛此清冷水濯纓鼓枻夕  
復朝虎溪松風鳴石竅香爐烟彩騰山椒恍然若在匡廬  
下雲入衣袖神飄飄溪流可鑑分妍媸照之誰云白與緇  
教兒兼學王右軍日以墨溪供墨池豈無題橋磊落士訪

隱蹤躑溪之澗拂石橫琴瞰流咏詩明月自至如與我期  
或時臨風酌醺醪醉眠蒼苔歌紫芝歌罷心自怡遐睨六  
合間何物等我思蔓草綠靡靡亂石白離離遊魚不復驚  
狎鷗能我隨共談畱侯黃石事人生樂在心相知

### 山中秋夜

夜對千峯秋氣新蕭條巖壑一間身松林虎出時窺犬茅  
屋螢飛偏近人傍月把書憐穉子臨風吹笛羨南鄰棲鳥  
應怯梧桐冷不斷悲啼欲嚮晨

### 爲李朝陽題松雲圖

澗上小亭雙石盤古松四五雲巒旣橫琴坐愛白日靜散  
髮長疑朱夏寒汎汎輕雲過峭壁微微香粉落水盤我欲

同君覓幽處醉臥瑤席臨風湍

李辰州黑首白身名馬歌

李侯名馬姿相別赤驪紫燕俱下列頭純黑色身徧白一片陰雲兼積雪自言辰州初買時城門走試驚飈馳少年旁觀皆歎息前者未聞今見之矯如元龍躍春水巨波掀騰玉鱗起夜將金絡光可覩畫鞡銀鞍色相似東還豫章今幾載黃金可市當十倍長鳴冀北羣已空出獵陰山意常在吁嗟李侯才更賢蚪須燕領神凜然明年踏雪趨幽燕青霄飛鞚朝九天九重詔拜大都護此馬願逐雙旌去

題蒙谷子圖

併序

蒙古氏脫寅字正巳自號蒙谷子家於隨州爲人

豪邁衣冠仍本俗而所守方介讀書談道恬然自  
樂至正初與臨江杜本等四人皆以處士徵脫寅  
授集賢待制至燕京以大臣之禮貌未盡竟不就  
仕而歸揭太史爲作蒙谷子傳其門生陳士文爲  
江西省掾以其圖求賦之

漢川之東美山水誰其隱者蒙谷子草堂披書椽櫟陰奚  
奴抱琴篁竹裏彈冠曾拜大夫爵洗耳竟作箕山士不隨  
鸞鶴凌煙霄盡使蛟龍在泥滓嗟哉世士多尚同嗟哉日  
荆渚樸風長安車馬若流水安得一來空谷中

題王維所畫孟浩然像

孟君故人好事者摩詰當年號蕭洒薦之明主旣不能綵

筆徒誇善描寫滄川風急天正寒  
灞橋雲黃雪初下蹇驢行行欲何之  
妙句直欲追大雅飯顙山頭杜少陵  
溧陽水濱孟東野饑寒一身人共歎  
聲名千載天所假南山故廬拂袖歸  
五侯七貴俱土苴龍鍾如此君莫嘲  
平生貴在知我寡

天寧寺賦七言八韻呈得之聲之雪印

江郭烟花綵翠重招提獨愛遠林松  
蹕雲似履山陰道披霧如看海上峯  
鶴樹深村窅窅鳬鷺沙淺草茸茸吟  
同仙侶移春艇坐借禪窓到暮鐘圖  
誌總歸周外史山川仍攷漢遺蹤垂  
綸磯畔潭光動飛蓋津頭雨氣濃金  
谷勝歡誰復有蘭亭良集苦難逢它  
時重約東林老共聽匡廬白



雪淙

趙伯友自豫章歸渝上有作因和其韻

高士心將鐘鼎疎危峯壁立見匡廬  
九霄不想瀛州路萬卷多窺石室書  
秋草故園烟郭外古篴閒館劫灰餘  
先墳歸拜還重去浩蕩鷗波得自如

題天馬圖

漢家天馬渥洼生來自玉關歸玉京  
十二閑中誇俊逸八千里外若飛行  
奚官解識超羣相樂府因傳異代名  
聖世方將按圖索陰山賴爾戰塵清

贈虛白道人

虛白道人神炯然薜蘿衣上帶山烟  
武功曾謁海蟾子緱

嶺兼懷笙鶴仙白石爲糧期久視丹崖結屋定何年它時  
語我金丹術猶待重過虎瞰泉

題常檢校執中琴鶴軒

華省歸來棲莫鶚層軒開處對明霞竹邊琴鶴心如水郭  
裏林塘客是家碧玉調高風自起元裳舞罷月初斜晝閒  
更喜詩清絕白石蒼苔松正花

夢中得詩二聯覺而足之

坐對南山鳴鳥稀松牀書帙逗晴暉閉門無客論朝市開  
口恐人談是非雨後翠生飛燕渚花時紅擁釣魚磯醴溪  
春色濃於酒莫遣風煙與願違

仲修宅春日分韻得闌字

疎雨澹澹烟沙村花邊石梁通小園荻芽水生魚欲上松  
林日暮鴉爭喧春醪傾玉渾易醉世事翻雲誰與論羣俊  
題詩擬陶謝且同燒燭坐東軒

社日

去年鈴北愁多難今歲城南將過春爲客偶同王謝燕歸  
農猶愧葛懷民杏桃烟際紅相向桑柘雨中青未勻童稚  
莫嗔無社假好題新句荅芳晨

傅元寶還理故業

歸來買犢擬躬耕親友聯居總弟兄金谷舊時花圃廢浣  
溪來歲草堂成旌旗千戍陰雲接舟楫三江白浪驚好理  
荷衣甌泉石深棲終不負儒生

赴召初至闕下呈張仁先生

十年巖壑懷江湖羨公高步麟鳳都轅門早已贊軍計廷  
論正賴裨皇圖退歸北嶺心想切佚老南郭勲名俱黃花  
秋晚香盈室翠柳春濃陰蒲嚮憶昔邂逅江都畔江波東  
逝雲隨散使節經過失遠迎林廬傾慕惟長歎萍踪重向  
闕下逢蓬鬢那堪老來看鄭莊論交共肝膽鮑叔知已忘  
崖岸龍灣秋水多石磯來舟日集歸舟稀校書且復留東  
觀遠道何由歌式微芙蓉未贈思渺渺兔絲攀附心依依  
老依巖壑倘如願願作問雲相逐飛

漢宮四時辭

春波鱗生大液池嫩黃垂柳金參差鴻鵠悅懌春風枝蹇

江詩卷 卷四  
幌攬睢光陸離鵠鵠容與鴛鴦嬉側耳玉鸞睇翠蕤粲粲  
桃李惜妍姿

木蘭爲舟桂爲楫水榭荷花映蒲葉紫金條脫碧單袷珠  
簾風動中自愜君王凝情在未央心歷四海思咸康離宮  
寥寥白日長

黃山嵯峨夕以陰蘭堂蕙閣候月臨禁門重重洞且深螢  
綴綺疏耀羅襟銀漢傾側玉繩低抱衾願遵內增悽萬年  
樹中烏夜啼

曆臺風迺雪逾白銅虬水來澀徐滴華鐙燭延沈燎燭寶  
帳象牀倚岑寂輸肝委膽奉明恩南山可摧石可掀千秋  
一日心永存

何伯遜見訪贈詩和答

百里來尋水竹村  
鵲聲將喜報衡門  
山中白石聊同煮  
世上黃金未足論  
詩似陰何思更苦  
跡追園綺道尤尊  
貧家無物堪娛客  
一樹寒梅雪映軒

再和酬簡明元

見說林塘詩思多  
竹連幽嶼草連坡  
晴雲過眼白衣化  
野水照人青鏡磨  
百畝山林宜稻秫  
千章岑木愛松蘿  
論交暮景相期遠  
迴日煩君借指戈

對雨

飛雨山棚爽繫雲  
竹巷迷翠藤低拂石  
黃葉亂沾泥樹杪  
盤饑鵲墻根立小雞  
園夫桔槔發新水  
滿青畦

偶成

山翁自愛緼袍寬  
白髮尤宜製鵝冠  
蓬巷三年貧不病  
竹書一篋老仍看  
鴟鵂亂噪丹楓晚  
鸞鳳稀來翠柏寒  
渺渺江湖交友絕  
空聞江海沸狂瀾

歸石門山居寄胡志同

一別鍾陵音問稀  
金門應召燕鴻違  
江湖屢涉詞人老  
書劍猶存遠客歸  
春雨刷苔思養病  
秋風製芟可爲衣  
莫年情味還相似  
幾誦停雲思欲飛

初冬對雨

虎瞰山頭東雨寒  
元雲張幕暗峯巒  
戀羣鴈驚沙汀  
集戢翼蛟螭水洞蟠  
遠送黃柑期竟阻  
將收紅稻徑難乾  
啼饑

最念家中稚近瘴長懷嶺外官  
隔雲昏眸妨散帙飛蓬短  
髮不勝冠草堂別構資猶少  
蘭友相思會苦難百尺橋南  
波淼淼十家邑外樹樂樂布  
衾夜冷夫須席豆粥朝慳  
菹盤客裏也同原憲室海隅  
空想葛洪丹敝裘百結何須  
結長鍊三彈且莫彈野性禮  
疎官長恕窮愁書就故人看  
登山擬藉樟爲屐釣瀨思裁  
竹作竿雙石如門吟悵望一  
溪遶舍夢盤桓霜厓雪峽歸  
與好甘共樵夫白首歡

題阮仲謙客子光陰集

阮君江海士不減嗣宗賢酒共  
名流飲詩從野客傳尋山  
經楚甸踏雪上吳船急景心  
嘗惜冥搜思獨元圖成輞川  
上花憶浣溪邊窗戶山擎月  
樓臺樹接天珍藏太史錄剩



集小山篇何日參元論臨流思渺然

觀清江傅氏西園題詠懷舊

憶昔西園曾見招春風歌響入春宵池上題詩花冉冉林  
邊歸騎雨瀟瀟

一別桃源迷故津花隨流水幾回春烟塵豈料逢今日翰  
墨猶期似昔人

前貢士練伯升新春貽詩且云將於龍虎山之側卜  
居因和其韻以爲別

碧山泉石與心親應愛桃花萬樹春采藥將爲眞遜士掉  
頭相別未歸人猿猱翠谷懷思久龍虎丹經點勘頰珠在  
裋衣誰解識紛紛唯羨五侯賓

清江道中

幾夜江城厭鼓鼙出關那得更遲遲雞豚曉日田家樂榛莽秋風過客悲

和葉生紅霞映水荻花連白雪盈疇晴天繡畫山溪景却是春光不似秋

宗海上人新住仙姑院寄贈

園苑仙姑境祇園珠樹林炎岡焚白玉淨地得黃金詩裏烟霞色軒中水月心高棲憶支遯遙睇碧山岑

劉承直

一作承直

承直字宗弼贛人元進士歷湖州同知明初被薦召對奇其才識授國子司業與修禮書出爲浙江

僉事引疾歸自稱崆峒雪樵

譙章光遠宅

薄暮沐時雨，凌朝陟崇山。  
洩雲去復來，流水清且閑。  
褰裳俯茅屋，高論激晴澗。  
層軒既顯敞，好鳥鳴間關。  
開樽意殊樂，劇飲未言還。  
何當脫塵鞅，共臥青松間。

題鮑典籤芳塢隱居圖

幽勝似仙家，綠雲石磴斜。  
陰崖留積雪，晴樹亂明霞。  
寺遠時聞磬，溪深未沒槎。  
抱琴來谷口，多是識桃花。

秋日東林宴坐

高秋坐虛館，颯然神慮清。  
迴颺疎雨瀟灑集，前楹始欣  
塵牖遠。稍覺微涼生，簷鐸遞相答。  
林蟬時一鳴，物情各有

適吾生豈無營

朱夢炎

夢炎字仲雅進賢人元進士爲金谿丞以博洽聞  
明初召居賓館除國子博士歷禮部尚書卒於官  
和伯顏子中韻

曾折蟾宮第一花西風吹袂向天涯班生萬里空投筆漢  
使三秋獨泛槎朔漠離愁成白髮南州鄉夢起清笳歸來  
恥學梁江總只傍青門學種瓜

錢塘西湖

萬戶煙消一鏡空水光山色畫圖中青樓燕子家家雨錦  
浪桃花岸岸風櫂轉舞衣凝暮紫簾開歌扇露春紅蘇公

江西詩徵

卷四十

明二

三

堤上垂楊柳尚想重來試玉驄

訪道者不遇

何處尋芝去未還空畱雙鶴守元關  
殘碁無主石枰靜舊藥不春雲  
碓閒流水桃花香冉冉古壇春蘚  
碧斑斑尋君不遇空歸去看徧長  
松雨後山

寫韻軒

奉籍江河悞洩機幾年謫降學書  
癡晴窗滴露花搖席午夜揮毫月  
滿帷綰得春風畱鳳帶畫殘秋水  
照蛾眉從今了却人間事一曲鸞  
簫跨虎吹

危素

素字太樸金谿人元時官翰林學士承旨洪武初

授翰林學士兼宏文館學士謫佃和州有雲林集

送章右丞戍廣西

文昌橋上紫駟嘶又送將軍戍廣西三省甲兵勞節制八  
蠻州雨人封提調弓曉射崖雲裂畫角寒吹海月低已喜  
皇威清海岱邑封上將拜金泥

題趙子昂竹石

叢篁偏映寒雲色古石猶疑碧蘚痕曾是碧瀾堂上月獨  
臨茗水照王孫

遊廬山栖賢寺

弱冠好山水竭來廬阜陽憇澗微雨至入林春風香載經  
三峽橋地籟聞鏗鏘解帶緣石磴愛此泉流長泄巖凝素

乳灑樹見飛霜泠泠轉空曲湛湛涵清光五老九千仞巖  
絕天中央紫烟射仙壑白雲冠僧坊幽思稍愉悅良朋共  
翱翔訪古墓宗向悟元愧裴揚超然色界遊圓靈大無方  
終當畢吾志混迹麋鹿行

梁國狄文惠公新廟詩

大江從西來萬里流湯湯維唐社稷臣勲業載旂常天子  
在房陵女后御明堂晨聞牝雞鳴腥聞溢穹蒼猗公秉忠  
義耿耿立廟廊周旋極黽勉論議忽慨慷載御卷冕歸宗  
社燿有光豈徒保國祚實欲扶天常雲孫江州牧思宮廟  
薦烝嘗豆籩孔嚴潔絲石載鏗鏘再拜久屏息低徊想忠  
良作歌勸臣子百代踵遺芳

後買琴歌爲鄧旭甫作

鄧敦好琴如好色十年買琴不可得  
南城縣裏客攜來百鎰兼金君不惜  
竹牀踞坐江盈盈臨江三奏魚龍聽蕭森  
巖壑秋氣肅洶湧天地霜風清商聲洋洋羽聲昔月墮寒  
光君罷撫餘音寄意愁人心別思蒼茫正如許爲余再控  
白玉絃長謠楚語招飛仙招飛仙安得見獨立乾坤淚如  
霰

期馮祥甫不至

寒山壓樓三日雨風卷崩雲亞高樹  
山人無事不下樓空谷寂寥誰與語  
平生故人大馮君約之不來歲聿暮歲聿  
暮君何之側聞他日撫州去又恐促駕江東歸  
梅花千樹



化爲雪寄贈惟有長相思

隴頭水

隴頭之水向西流莽莽寒雲草樹秋水中尚有秦時血今古征人到此愁

酬答葉國賓游演法觀

磬牙細路洞門寒松柏蕭森太乙壇堦坼倒流千歲乳井空深蓄九還丹溫泉觸石陰雲起白露凋林古木攢我愛登臨發高興廢歌自寫寄君看

送朱尊師

上清真人佩瑤環遠遊荆楚何常還月波流空寒似雪雲氣拔地高於山去年乘風上京國稽首靈君好顏色蓬萊

坊裡烟霞深昔種蟠桃親手摘忽思舊隱玉隆宮怪物鎮  
在深潭中浪濤無聲江漢靜兩劍噓氣如長龍爾來復作  
西南去織女迴車引歸路解纓秋濯洞庭湖采藥晨餐石  
鍾乳翩翩飛馴金盤陀芙蓉玉冠高嵯峨醉中長謠送君  
發一夜北風吹女蘿

游石門寺有懷表兄張伯玉

石門金刹鬱嵯峨千古樓臺插碧波林結春陰萌草木巖  
扃水氣吼鼉鼉野僧貪供雲生鉢一老垂竿雨滿蓑腸斷  
張郎成阻越獨攀蒼竹聽漁歌

送程朋游華蓋山

吾郡紫元洞程生遠遊遨別懷不敢寫聽我哀絃操茲山

東南勝秀色凌空高細路積霜雪長林帶湍濤天雷震洶  
洶飛瀑鳴滔滔文豹晝深伏窮猿夜嗽嘈行行發猶詠陟  
險母乃勞昔遶洞室脚天風入衣袍王喬不可見使我心  
切切余本尚疎放夙志思林臯何當絕埃壒高舉乘鯨鼈  
頡頏飛霞佩不必煩圭刀

游翠雲關和吳山人

白雲迴繞翠雲關晉輩登臨樂意閒樹拂微烟秋淡淡  
通晴瀑夜潺潺悲風卷地虎坐石黑氣貫天龍在山老衲  
平生不迎客避人深入竹林間

寄題大瀛海道院

明月東海角道院幾年開寶構通丹極瓊林閼玉臺鍊形

長對竹遣興獨尋梅羽駕乘雲氣瑤臺拜斗魁鳴簫朝引  
鳳飛檄夜鞭雷芝草靈苗潤珊瑚老樹摧滄波馴白馬幽  
窟鐔黃能水怪能言語龍精自往來仙家凌宇宙弱水截  
蓬萊漢使游空返秦皇去不回青山寒翠色赤日漲黃埃  
望極蒼茫外羨門安在哉

送鄭復常歸三山省親

嵯嵯塵湖山飄飄紫微仙十年山中鍊形魄縹緲御氣凌  
蒼烟采芝朝入虎窟飲抱月夜就龍宮眠洞天石扇星斗  
落紫鳳一舉天風旋君家正在滄海頭十洲三島烟霞幽  
手持瑤華度海去白雲亂洒扶桑秋歸來何以爲親壽蟠  
木結實行當求

送李常游匡山

匡廬鬼神聚崖壑擁青紅泉洩二儀動山包數郡雄近聞  
桂道士高臥白雲中

呂尊師畫三茅觀梅藤爲圖號曰二老走筆賦之

三茆觀邊老梅樹梅邊更有老藤古誰持此畫江西來太  
瀛海中呂道士藤枯一似蛟龍縣梅瘦飽受冰霜纏柯枝  
不逐浮世換根柢直與扶桑連傳聞苒君親手植坐使草  
木皆成仙宋朝渡江一百年世人不到吳山巔豈知二物  
閱興廢及見渤澥成桑田戰爭揖讓等黃土展卷血淚何  
漣漣

嵩山游

僕生慕宗少文李太白有世外風格思山水之好  
繇雲林西行七十里得密山境甚勝因與鄒習同  
游泰定二年九月也

祈仙古觀摩空青手持鐵杖山中行浮邱真人不可見窮  
窮萬谷酣秋聲捫蘿直登六七里下頰世間真井底雷霆  
震動獵雲硯奕奕靈光夜深起尊師有道虎狼馴瑤草滿  
地山如春仙公不歸鶴自語老木夾路龍生鱗鄧卿顧我  
三歎息滄海蟠桃幾時得千年虎魄尚可食曾見紅顏生  
羽狻

兒秀才古劍歌

紐鄰元帥征蜀川數州殺盡無人烟天開地闢建大國尚

有兵氣沉江邊故人西來得班劍威古淒涼淚如綫土花  
蝕盡青燐殷光采迸雲垂白練大船載之瞿塘歸滯濤震  
掉鞭馮夷濱鬼縮頭形支離突蛟斬頸血淋漓江東豪士  
何年得四坐諸公變神色電光耀耀迅雷飛殺氣冥冥兩  
儀黑櫓槍不動邦國寧天王垂拱黃河清豪曹雖利竟何  
用徒見青天白日風火生

贈查泰宇之閩清主簿任

鵬日照白馬查公往南荒南荒二千里馬瘦道路長官役  
相程期車載十日糧路經龍虎山且住深淨堂諸公設高  
會四座排金觴繁弦間豪管侍女清歌揚問君行藏計陳  
義富且詳爲言十四五博學交老蒼少壯志浩蕩仗劍游

四方不意晚得仕鬢髮飛秋霜教授古吉州講論明三綱  
讀律始親民竟過炎海傍出爲縣主簿又恐案牘忙廬阜  
青遙遙彭蠡深泱泱豈無田園居亦可歸耕桑不可慕高  
尚匪獨承寵光恭惟古君子氣貌何端莊昔在習鑿齒今  
之漢仇香方當盛平世帝聖輔弼良四夷息征戰猷猷無  
旱蝗凡居郡邑職敬戒垂永臧上當宣德化下欲赤子康  
公行勿遲留鸞鳳終高翔山雲白浩浩海月秋茫茫寄書  
問骨肉毋使失相望鄙夫江海客年少血氣狂把酒執衣  
袂贈之紫游韁人生貴交誼自此毋相忘

陳物初清暉堂

尊師家世華山陳新築高堂古澗潛臨水每同鷗結社采



花閒與鹿爲鄰窗通晴旭排高樹簾卷秋風暗綠筠振屐  
梯山烟淦淦縛船登瀨石粼粼鳳銜春色頒眞誥龍吐霞  
光夾羽輪陰洞衿中雲似塔白崖奔處雪如囷拂衣蘭草  
已多碧在眼楸花無數新鐘磬撼林羣鶴唳丹砂貫井毒  
蛟馴張公昔者來歸隱陸子前朝此問津烟雨晦明眞若  
畫山川靈怪豈無神未應芝嶺終辭漢可是桃源不記秦  
我欲從今就君住定看東海卷黃塵

五月廿有二日同鄧漸叔儀讐季昭旭肆父昶刪父  
晚眺以森木亂鳴蟬分韻

良朋宴游不可失鄧氏諸昆晚同出橫槎溪口弄飛泉桐  
樹坳頭看落日長山唐突無山青山上十丈蒼雲橫大風

振林歸鳥疾枯木壓石殘蟬鳴登高長嘯招晴月古竹吹  
涼夜如雪夜如雪秋氤氲溪流無滓山無塵寫詩聊寄山  
中人

和吳尊師龍興紀游四首

早飯僧陂

舟泊楫陂驛斫魚餐早飯是行新雨過水落寒沙半櫂謳  
方零亂鷗鳥忽驚散笛聲起滄洲又逐驚鷗斷

過清遠驛

雲滿故鄉芳草迷江東江西人別離征船幾日洪都去清  
遠驛前聽子規

游鐵柱觀

已從龍興游卽往鐵柱觀龍興不出與區區鴻水奔流合  
江漢沉沉古井清如空東方大海長相通千年神劍不可  
忽老屋夜夜生雷風

泊宮步門

人歸石城邊鳥沒白沙尾秋風涼蕭蕭波靜月如洗水鳥  
棲不定半夜猶飛起

公無渡河

提壺公向何方止公勿渡公欲行婦人之言公不信蛟螭  
縱橫河水黃從公死入河水千載同作河中鬼

子規啼

子規啼白月低春雲迢迢春水遠芳草遶庭花亂飛子規

啼時征夢苦，郎船定發瀟湘浦。  
瀟湘江上風浪多，春晚胡  
爲不歸去。子規好去瀟湘啼，  
重來偕汝春樹棲。

與鄧叔賓兄弟叔姪以王喬下天壇，微月映偕鶴分  
韻送三吳山人游龍虎山兼簡江左諸師友

蘿風吹蕭蕭，筠露爭灑灑。明霞結晴曦，曉色晃相射。  
手指雙璫英，一去青山下。迢迢鳳麟洲，雲氣浩如瀉。  
寄謝山中  
人離情若爲寫。

寄張太乙張時畱江渚

我曾身著夫容裳，笞麟游遍蓬萊鄉。  
蓬萊仙人畱我住，醉  
枕大石歌瑤章。高秋及上廬湖頂，下頰八極天茫茫。  
石林  
風煙白日靜，但有瀨氣如飛霜。張君獨乘紫鳳凰，我得霞

珮驂翱翔星官下謁奏廣樂衆客燕集翻瓊漿曾樓高空  
不得寢神飈夜撼金琳琅歸來雲林閉戶坐忽憶舊事心  
飛揚竊聞三月之初吉飛車直過東海傍莫從故都歎禾  
黍定駕大舶窮扶桑湖山迢迢湖水長何由寄贈雙明璫  
春中上高橋軒

春草如帶長生於阿嬈墓不見墓中人但見墓上樹

小孤山歌

大孤之石衡且橢青青長在湖中臥小孤之石銳以高峭  
立淮岸當洪濤滔滔逝水東流去兩石焦髯屹天柱蜀巴  
之原浩沕沕壯哉此地江海門鴻龐稍見土宇曠疏鑿方  
知夏后勤名山大澤神所主過者震驚誰敢侮云何作廟

向江瑤搏土娉婷象龍女  
篙師買客爾何知坎坎伐鼓持  
豚蹄倚篷清坐漁歌起日莫沙禽來去飛

贈朱元吉賣墨

深山閉門二月初白日雨打梅花枯  
野夫讀書大石上粵有一客來吾廬  
水杭舟楫陸乘車來徵後語行江湖  
戢戢石峯起雲氣下壓古井蛟龍居  
詎知山人夜燒墨墨色吹作煙模糊  
元光貫天衆星沒草字滿壁陰風噓  
述文志者奚假文通達今古良非迂  
悲哉結繩易書契割割元氣姁無餘  
遭逢盛年當返樸誰復瑣細稽蟲魚  
遠遊京師願寄贈謹爲皇帝書貞符

叔儀送扇

撫州竹扇制來新鄧子持歸贈野人六月江南如此熱海  
風一起靜黃塵

贈員怡然員善琴余與之寓于上清宮

我來蓬海堂中宿風露滿空月在竹西秦員老夜撫琴妙  
音總是雲門曲先生作樂音律諧載歌南風阜民財陰湫  
元龍衝石裂赤霄鳳鳥從天來千年古調誰能改一變新  
聲吁可怪願借琴高赤鯉魚與子騎之入東海

鄧叟時可大寒中見過語余曰余今六十八歲矣有  
一子在閩三年無消息顧貧且病無所依倚不能無  
求於世余悲之欲濟之橐無一金相對歎息追和蘇  
子贈扶風逆旅詩載之簡軸因以送叟

鄧翁老耄食無糧臥病愁多白髮長千里南閩無過燕五  
更秋雨亂啼蛩年來破屋塵生甌歲莫空山雪似牆愧我  
相逢貧到骨悲歌此曲意蒼茫

答呂尊師香水珠

野人頭不巾曠蕩禮數略破帽久無纓時遇大風落得君  
香水珠感此意不惡薰之麝臍馨貫以青絲索細文疑瑪  
瑙潤色映掌握頗煩番舶載亦費巧匠斲整冠揖貴人使  
我不能樂何得從君游高舉謝城郭

投簡李仲公甫

江東雲錦山積翠修以峨云有千載士憇彼山之阿考槃  
幽澗石結製彼澤荷貞心抱夷澹雅量涵冲和傑也江西



人齒穉俠好多東將浮渤澥北擬窮沙陀尚懷詩禮趨吾  
父須髮皤生死願相許誓以心靡他露中葭翫藂海底珊  
瑚柯晶光礫塵淖結託古則那載詠伐木篇亂以采薇歌

莫冬

種稻南谷口因歲困倉虛晚值老農語出口三嘻吁幸有  
高亢田種麥給羣需有麥且免憂無麥將焉如

昔謂崖谷底其俗異黃農浪跡城府歸却愛淳樸風獵夫  
不射雁云與兄弟同羽毛豈知道天理諒無終

挽達兼善

大將忠精貫白日諸生攬涕讀哀詞天胡不隕楊行密公  
恨不爲張伯儀滿眼陸梁皆小醜甘心一死是男兒要知

汗竹留芳日只在孤舟淺水時

題營邱山房

太岳流芳裔何年徙贛州殊勲思尚父作室表營邱故國  
兵戈後空山草木秋穆陵關北路風雪近曾遊

送張幼初之京

振衣鳴玉上青霄銀漢清秋轉斗杓北闕飛龍天杳杳南  
雲歸雁路迢迢朝登華岳風生腋夜飲灤河月入瓢水竹  
清虛好真館劉安有賦爲相招

題三韓沙門玉田花鳥圖

畫史幽居得物情毫端春色可憐生高僧已是禪心定花  
鳥逢人更不驚

題宋好古

我憶東曹粉署郎琅玕寫就拂雲長祇疑散步雲林曲獨  
聽秋聲待晚涼

送友人遊剡

常山縣前放船開桐廬江口寄書回君行不受人間熱六  
月海潮如雪來

胡行簡

行簡字居敬新喻人元進士歷翰林修撰除江南  
道御史遭亂乞歸教授鄉里洪武初徵修禮書復  
主江西廣東鄉試以病辭著有樗隱集

題靈司鄒宗文山中野人卷

蓬卜萊肥遯結廬南山麓朝隨猿鶴遊暮共麋鹿宿松風  
入琴清蘿月照樽綠高情抗層霄文采振流俗嗟余熱塵  
纓喜君明遐躅遙睇孤雲飛白駒渺空谷

送友人之任

落落循良守文華振士林郡連平野闊城俯濁河深戀闕  
丹心在憂民白髮新甘棠應種滿蔽芾藹春陰

玉笥道中懷袁鍊師月舫

憶昔先君謁洞天至今猶記舊山川蒼龍出洞寒雲合白  
鶴歸巢夜月圓甲士連營門列戟羽人避地竈沉烟貞元  
會合回嘉運稽首雲中望列仙

題傳道顯築叟卷

資溪如畫水涓涓築叟逍遙卽是仙倚杖靜觀紅日上垂  
簾閒伴白雲眠榮華一覺莊周夢經濟三看說命篇珍重  
匡時應有意肯爲霖雨兆豐年

趙璜

璜字伯友新喻人至正中鄉舉爲上猶教諭洪武  
中與修元史復修日歷授翰林編修出爲靖江王  
府長史

阮仲謙客子光陰集

楚水吳山記勝遊嗣宗孫子尚風流故園歸種千頭橘浮  
世休論萬戶侯雙景往來成晦朔羣芳開落自春秋古來  
豪傑皆堪恨獨賴長歌散隱憂

江西詩徵卷四十一

南城曾煥寶谷編輯

明

熊太古

太古字鄰初豐城人朋來子至順三年鄉舉官翰林院編修國子助教江西行省員外郎元季隱耕山明初徵較雅樂畢告老歸

送復上人遊吳

二月鍾陵花滿煙袈裟東上木蘭船地浮彭蠡江聲轉山入姑蘇海氣連千里從師應未晚五湖爲客漫多年遙知後夜相思處坐看中天好月圓

黃 肅

肅字子邕新城人元季官禮部主事明初謁行在  
命仍故官陞侍郎已降郎中復陞工部侍郎任尙  
書未幾出參政廣西有醉夢蘂

短歌行

來日苦少去日苦多人生不滿百痛當奈何不如沽美酒  
與君長笑歌峻坂無停車急川無停波人生不滿百當復  
奈何來日苦少去日苦多

詠懷

少壯好遊覽不知中道憂方茲懷故土寄此成淹留員闕  
蔽朝暉元雲陰以浮徘徊當永夕嫵婉將焉逮棲鳥翔不

息鳴鵲亦啾啾人生無定止卒歲何能休

馬瘦足力短士貧心志窮相如豈不偉滌器難爲容憶昔  
擅詞賦左右能生風黃金資費用意氣自填胸迺邇勿復  
歎命達皆稱雄

流水日夜流厚土胡不盈人生自不已四運有相承達士  
識物化昧者徒營營蕩蕩晨風來悠悠天宇清會當撥俗  
惡聊復從吾生追呼心所歡置酒坐中庭忘言勿復辯觴  
盡還復傾

有酒旣已飲茲愁仍復生何如長戚戚憂患有相并日月  
迭更代何能久安榮唯當委薄質允矣將微誠君心苟有  
察婉孌餘芳馨誰謂在咫尺邈若萬里程明明亮自適靡



靡詎遑寧

中園桃與李灼灼有奇花彼姝將折贈遐思在天涯此花傷夭折爲歎女容華盛年難再遇豈得長修姱夫子新好合不能思故家欲因歌此曲此曲令人嗟

匣鏡三十年塵暗不復治停食且不寐所思知爲誰蕩子不復返眇在天一涯綻衣終當組道遠何能持明明天邊月三五入中閨念與子懽愛不得同光輝寤言相與共旣覺將何依

白頭吟

長絲弦聲緩短絲弦聲急長短苦不齊抱取向郎泣明粲皓月三五圓缺念我所思中道而別噉噉雲中雁北風聲

烈烈願寄一行書與郎相訣絕泰山高崑崙海水不見底  
妾心終不移研山枯海水

長相思

望歡城南頭覽取別時路路邊有深井井上有雙樹樹有  
東西枝枝葉盡相比去年東枝榮今年西枝悴年年望樹  
枝樹發行人歸

仙人篇

翩翩騎白鹿言上泰山頂俯觀浮世中不見百年影道逢  
古時人綠髮被兩領授我採藥訣延年保壽命我聞再拜  
跪問是何方求撫我挾我肘與我上天遊天上多桂樹枝  
葉何脩脩折取忽盈筥馨香霑我裘何因入君袖道路長

悠悠

客中春懷

竹裏山雞啼未休江南二月景如秋半簾花雨寒欺袂一  
片江雲晚傍樓亂世青春如過夢少年華髮忽盈頭故園  
動是經年別滿眼干戈添客愁

寄劉紹

城南劉子憲來往卽吾家連榻書樓小鈎簾石壁斜金圓  
霜捧橘冰碎夏分瓜苦爲吟詩癖更闌更煮茶

明日知何地杉關十月天遙憐五載隔不見一書傳歛蕩  
聞還海艱難愧客燕幾時歸碧澗相對看紅泉

秋水湖天老菱荷江南風景定如何高堂童稚勤燈火華

屋神仙艷綺羅雲錦書生題鳳筆風花晴點釣魚簑惟公  
獨占滄浪曲着我扁舟亦不多

吳彤

彤字文明臨川人至正間與虞伯生危太樸同舉  
進士除贛州錄事明初以薦起國子博士同知嚴  
州終北平按察司副使

峽口晚泊

川路渺無際揚帆遡流波征人嘆遲暮舟子方笑歌去去  
日將夕維舟松上蘿坐嘯微雨歇洲渚落花多

翠壁隱殘照滄洲生夕陰鷗鳥忽飛去幽幽春水深涉險  
念先訓觀風推聖心功名覺遲暮蕭颯二毛侵

日落潭水綠松間聞子規征途一萬里江月每相隨王事  
有程度人心多嶮巇周詢庶有濟驅涉不知疲

江煙斂初夕華月入我舟坐久風露集微寒侵敝裘戍鼓  
動邊思櫓歌繁客愁漸聞湍響急度峽是歸州

張羽

羽字來儀後以字行更字附鳳潯陽人寓吳興元  
末領鄉薦爲安定書院山長再徙於吳與高啓楊  
基徐賁爲詩友作畫師小米洪武初徵授太常寺  
丞尋坐事竄嶺南未半道召還自知不免投龍江  
死有靜居集

擬古

今日上客至置酒臨前楹絃歌四座起中有擊筑聲此曲  
誰所爲絲急調不平竊聽不敢言下流人所輕迴視匣中  
劍感德涕縱橫

雜詩

蜀嚴好沈冥日食止百錢卜筮人所輕久幽操彌堅君子  
有所貴乃不在當年百歲有知音何啻鍾期然子雲太區  
區譽文公侯間卑哉益州牧乃欲更高賢豈無君侯貴敢  
見不敢言斯道誠兩得永爲後世傳

此邦非吾土寄跡聊在茲旅食何所營亦復假耘耔立夏  
苦霖潦良苗奄離披至今畎澮間餘波渾渺瀾行恐春澤  
盛畊墾失其時共虞斯人艱豈獨念吾私先師有遺言耕

也有時機且當竭所務天道非我知

伯鸞春吳市伉儷乃相之布衣日操作椎結無容輝居貧  
敢忘敬舉案與眉齊斯人亦何修感彼糟糠妻買臣躬負  
薪室家請長辭豈惟匹婦醜君子諒有虧周道興閭房社  
席豈爲微所以冀缺耨重耳任不疑斯道久寂寞招撫爲  
此詩

懷古

生平慕遊俠驅馬遍東周周人重千金所遇非我儔撫劍  
登泰山歷覽魯與鄒小儒事絃歌齷齪安足由北臨邯鄲  
道平原曠悠悠嘗聞虞卿賢斯人不可求悲哉窮途士緩  
急將焉投

寄題北山堂

雨罷寺樓曉曲堂秋樹閒暫輟今朝請一玩北湖山仰瞻  
上方雲遙見林屋關飛淙盡日雨流禽先暮還卽境知妄  
迹觀空怕妙顏余乏道門舊阻陪高坐閒馳詠終非侶當  
冀一追攀

題陳惟允臨刑所畫

若人悟解脫委形順天刑慷慨赴東市一日爲千齡李公  
悲上蔡陸子喟華亭識機苦不豫達生良可經朱絃亦易  
絕仄景不可停從容灑芳翰炳煥若丹青妙藝永傳世精  
魄長歸冥披圖懷平素清淚緣襟零

春日陪諸公戴山眺集暮入桃麓得石床巖洞諸勝



張宴凌山極返策揭澗陰南岑夙厭歷北麓今始臨危磴  
絕來術崩壑瞰空潭幽竇抱虛白哀牝遞清音旁探闔窈  
窕側坐倚嶇嶽古苔文已駁春蒲茸漸深幽禽鳴相續驚  
麇竄莫尋扳蘿胃修袂折蘭芳素襟奇縱閱自古勝賞發  
予心雖微舞雩詠敢諧溱洧吟山河永衿帶微生終陸沈  
愧乏古人操將何視來今

於書麓中得吹臺所寄詩遺稿

拂塵啓敝篋忽覽故人詩撫迹疑若存驚逝杳難追憶昔  
吳苑遊文采衆所推名談析妙理華襟吐芳詞子時在城  
北高齋臨清池焚蘭延佳月對酒彈清絲誰云茲夕歡乃  
爲千載期冥漠游魂遠淒涼親翰遺墨塵尙留影紙敝猶

含滋玩此塗灑澤想君哦詠時華章未及振厚意諒已虧  
收竟一長慟林風助余悲想當寫寄日茲感君詎知

沈集自錢塘歸作此示之

錢塘昔所遊形勝此邦最尙想鳳凰山飛翔落天外胸吞  
滄溟寬江水渺如帶海門豈天設屹立兩峯對汐潮類臣  
妾朝暮屢進退羣峯峙明湖浸滌百川會不意玉女盆居  
然墮闌闌崔嵬白塔寺零落宋南內荒堦與斷礎龍鳳紛  
破碎昔聞毫社屋厭鎮信可怪豈徒鞭荆尸戮辱極狼狽  
番僧固可醢柄國豈無罪雷師秉炎火焚蕩意頗快至今  
遺民過涕泣行且拜爾遊何草草弔古須我輩落日望東  
南臨風發長慨

舟中

朝發戴山岑夕逗金溪濱雲天方慘栗川途屢迴復颿駛  
岸疑轉棹奔山似逐鷗鳥隨波汎霜漸含苔綠依依浣女  
影嫋嫋榜人曲采竒忘來遙耽勝成往速悅生良可懷徇  
名非所欲請識孺子歌去矣從我獨

寄吳隱君

若人隱真趣飄飄懷古仙振衣入遠岳順風祈一言寂歷  
微妙韻精明天姥篇清叅和玉齒焚香禮軒轅九嚙華池  
液七返流珠丹頤性得天和齊物同化先五芝非吾茹聊  
以蘇世痛神期苟冥會飛步升九天抗迹揖浮邱麾手招  
僊僊下視倉扁流永爲塵紐牽

詠齋前紫薇花

彼美掖垣秀遺此荒園中賦質非有異置身偶不同屢供  
樵爨餘生條幸不窮蒙龍委榛莽灌溉關人工謂同衆卉  
棄忽有孤花紅生長不擇地始知元化工褰衣遶清渠輕  
香散晨風似感幽士知芳意默自通一聞清露翻預恐綵  
雲空等是榮謝理何待植南宮

由竹溪至梅溪偶成

出門懷清曠入舟苦炎熾皇天從人欲飛雨颯然至風吹  
波上寒淒其感秋氣暝投山僧眠復得清淨地舟人候明  
發徒侶不得遲沂流多枉渚篙楫頗告瘁雖微三巴險事  
與五盤異聞昔天目頂靈物久潛闕一朝赴大壑怒折崖

谷碎回頭顧其兒首尾屢相值至今此溪水斗折七十二  
世遠衆喧傳茫昧竟誰識但欣秋濤壯水物俱得志我何  
憚行役沿洄領佳致鷗鳬泛淡濫蓼蒲蔚蒼翠人煙亂餘  
集茅屋若基置之子住河澗相望勞夢寐每怨川無梁握  
手今可跂憶昨訪我初茅齋夜深閉扣門滿衣雪僵立不  
得跪移燈具鷄黍濁酒寒不醉同來鄭廣文清瘦凜欲睡  
絕勝王猷慙返棹何太易茲行冒暑雨古禮尙報施逝將  
櫟輕僥待子思共濟散髮乘長流垂竿釣清泚虛舟總超  
越萬里誰能繫恐此未易期臨川一長喟

贈胡若海

胡萊兩才子束髮好從戎棄書去學劍聯翩行伍中論兵

舌吐火見敵耳生風連鑣度狹邪接席醉新豐萬里逐輕  
車十年無戰功歸來投文吏相顧各成翁知命故無怨爲  
儒豈不通聊復釋短褐從茲事章縫君恩承見收吾道終  
未窮乘輅九真界策馬三晉衝一身隨簡書分散如飛蓬  
嚴秋九月天握手此相逢垂楊欲生肘浩氣猶填胸却話  
向來迹恍然醉夢同一贊少昊司出入蓬萊宮一佐青陽  
宰絃歌百里封人非鳥獸羣焉得長相從換酒金陵市分  
袂新亭東高歌清驪曲笑拂寶劍鋒致身貴勛業泣別非  
英雄石城接秋浦九華應茅峰欲寄碧雲句中有雙飛鴻

夜坐

閉門催閉早日落古垣深移床傍秋草對月聞高砧角巾

清露氣華觴淡夕陰毋言怨遙夜幽獨故予心

潭上偶詠

回澗曲如月冷然綠樹根雲山自幽寂水石共成喧靜觀  
因悟性耽聽欲忘言何由駐塵駕迢遞一尋源

送莫文學入郭却還谿居

蟬鳴山郭晏一棹出煙扉涼風將皓月迢遞送君歸自識  
門前樹遙聞窓下機應歎緇塵滿臨流一澣衣

龍江灣

元天無烈風江水日夜清馳波渺東注迴流抱神京至哉  
鍾水德乃以龍爲名舟檣萬方合雄麗殊百城昔云天塹  
險今爲衣帶縈山川迹不改人理有代更下馬入官船茲

焉始孤征祀事有常期中心念王程俯視萬仞淵不啻溝  
澮平涉川古所戒事重軀命輕

### 觀音山

連山爭南馳劃斷滄江曲勢如萬馬奔鞭轡忽迴復石角  
不戴玉蒼然四無麓寸草不得榮唯含古苔綠波浪撞其  
根巖竇響琴筑浮圖乃善幻凌虛架佛屋行人願利涉望  
拜各致祝人生貴心事安能慮存覆我欲升其巔憑高快  
心目飛傳不可留一往如電速

### 金川門

兩山夾滄江拍浮若無根利石儼劍戟風濤相吐吞維天  
設巨險爲今國東門試將一葦守堅若萬馬屯我來及清



曉天空霜露繁列宿森在水北斗若可援江光含海氣溟  
滓神理存俯視不敢唾中有蛟龍蟠浮屠者誰子高居凌  
風旛不見渡口人擾擾蜂蟻喧愧彼超世士去去將何言

邗溝

哀楊夾高房北風暮颼颼隨逢長老問會言是邗溝相傳  
開鑿初民勞天爲愁至今濁河底時見白髑髏陸通梁宋  
郊水漕荆吳舟渠成萬世利慮始難爲謀至今南北交此  
土爲名州飛閣跨通波張幄如雲浮憶昨少年日寶馬珊瑚  
鈎經過劇季輩結交金張儔醉月瓊花觀徵歌明月樓  
羅綺朝還暮生筇春復秋繁華逐逝水一往不可留向來  
歌舞地茫然孤兔邱家老無兒孫杖箠驅羊牛少小心尙

爾不知今白頭欲從亂離說恐子增離憂長揖入門去清  
淚如絲流

### 高郵城

茫茫高郵城下有古戰場當時魚鹽子弄兵此跳梁燕師  
掃境出供餽走四方長困四百里旌甲耀八荒勢如泰山  
頽一卵安能當驕將存姑息頓亦待其降雨機不容髮豈  
暇慮殺傷一朝謗書行將殞兵亦亡惜哉三里城百萬莫  
與亢鹿走命在庖終然屬其王空餘菩薩臺落日風沙黃

### 題雲山圖

潮落寒沙廣蒼然遠山暮何處吾師歸自識門前樹披圖  
憶所歷彷彿松滋渡

登桐塢後巖

牽蘿陟雲崦，憇此盤陀石。欲去更題名，淋漓蘚花碧。定有樵夫來，惟是龍蛇跡。

山中答武康徐高士寄書

久別得君書，開緘散吾慮。不寄山僧來，何由知我處。剪紙答君書，還寄山僧去。爲問片雲間，何時一相遇。

續懷友詩 并序

予在吳園城中作懷友詩二十三首，其後題識者四人，則嘉陵楊君孟載、介邱王君止仲、渤海高君季迪、鄒郡徐君幼文也。時予與諸君及永嘉唐卿者游，皆落魄不任事故，得畱連詩酒閒，若不知有

風塵之警者及其後移家武林向所懷甘三人往  
往而見而五君者或謫或隱各相睽異歎離合之  
無常感游從之難得作續懷友詩五首

余左司

幽居古垣下其彼嘉樹陰比隣豈無好念子是同心芳英  
帶露折清尊向月斟欲往尋遺躅荒園春草深

楊典簿

藩翰屈長才蹉跎事文筆賓筵罷醇醴容臺淹下秩高門  
去後靜孤帆望中疾少別歲已華思君無休日

王逸人

衡廬古巷中高駕日相顧芳草掩空扉知君斷幽步殘烟

北寺鐘暮雨閤門樹携賞邈難期庶望遺緘素

高徵君

予旣遷山郡子亦返郊園兩地花俱發離愁春共繁已罷  
臨池賞仍睽傾座言從來作者意寂寞向誰論

徐軍咨

常懷稚子悲復灑佳人泣草草從軍旅悠悠去鄉邑芳郊  
連騎行烟郭同舟入當時苟不樂追歎何由及

經德壽宮遺址

廢苑民侵久故迹理當微鳳礎埋將隱鴛瓦墜應飛輦池  
逢折珮薶草得遺璣西陵亦如此神遊何處歸

古詩三十二韻奉寄蘭室袁居士

吳興袁居士弱冠爲吏師鹿鹿三十年起身遭亂離是時  
邊兵驕殺人如刈著名吏掾幕府狼狽不得辭軍門日斬  
斫劍戟風差差雖有幙中賓俛首莫敢窺掾曹職雖賤不  
畏虎豹姿論囚不當律不肯書獄辭長興本屬土咫尺爲  
邊陲居人私往來互市各相資邊吏要功賞誘致遭拘繫  
詔言犯我法羣然送圜扉將云罪當斬掾云罪當箠師律  
公所守吏議我所持此本無辜人未嘗戰交綏死者不可  
生安得恣芟夷不然請殺掾不能相詭隨箝紙不令署抗  
言動旌旗將威亦少解往往免爲屍從容抱案下一軍爲  
之危事過不言功但言職當爲真聲撼大府加官升左司  
歸來田野間婆婆髻如絲亂世身獨全家有兩孝兒當時

其事人竄死吁可悲天道當與善此語不吾欺歲久恐埋  
沒高義無人知我欲爲紀述傳信不傳疑諸君細紀憶追  
錄休闕遺所活幾何人主名復爲誰新春幸緘來此事匪  
我私雖微良史才要爲來者規

畫雲山歌

我曾曾遊廬嶽頂欲上青天凌倒景山中白雲如白衣片  
片吹落春風影雲晶晶兮花冥冥萬壑送盡洪濤聲恍然  
置我滄海上金銀樓觀空中明上清真人笑迎客夜然桂  
枝煮白石手持鳳管叫雲閒虎咆龍吟山月白明發邀我  
升東峰導以絳節雙青童天鷄先鳴海日出赤氣照耀金  
芙蓉屏風九疊花茸茸霧閣雲窻千萬重胡不置我邱壑

中一朝投翅入樊籠空留萬片雲掛在清溪千丈之寒松  
愁來弄翰北窓裡貌得雲山偶粗似遂令殘夢逐秋風一  
夜孤飛渡江水夢亦不可到圖亦不可傳不如早賦歸來  
篇仙之人兮待我旋安得齷齪塵埃間坐令白雲摧絕無  
與掃青山笑我凋朱顏

爲童文學題韓介玉畫

我識河東老詞客鶴骨伶俜長八尺白頭徒步拾公侯人  
生變化誰能測將軍跋扈天爲傾公持寸管力與爭當時  
真氣動朝野至今文采傳諸生諸生白面今已老三載漁  
官空潦倒罷歸百事無所爲萬壑千巖恣揮掃丹邱元圃  
落眼前澗水松風鳴浩浩由來絕藝出天機俗吏紛紛事



醜好吳興博士今鄭虔故山未歸雪滿顛今年召對席屢  
前蒙恩親賜水衡錢歸來見畫心茫然拄杖欲問金華船  
金華之洞小有天下與五嶽相鈎連初平鍊丹去成仙弟  
兄相隨風翩翩洞前石正如羊眠我欲訪之何由緣安得  
與子相周旋饑食紫芝拾瑤草石上一笑三千年

余將軍篆書搨本歌

余將軍守舒州舒州之城大如礪長江西來遠城流賊船  
如雲壓城脚將軍提劔坐城頭寶劔未動賊已奔鯨鯢蔽  
江江爲渾孤軍六年二百戰王師不來城自存無兵猶與  
戰無食安可支豈無愛妾與愛馬殺之不解壯士饑力盡  
勢竭將奚爲倉皇齟舌罵不已義士三千同日死只今猶

有盡忠池碧血清冷化爲水將軍持節東州時作此篆書  
形崛奇妙墨已隨神物化好事當時臨得之雖非其真意  
獨在垂金屈鐵蟠蛟螭我拜重是忠臣迹秦斯雖古其人  
非嗚呼將軍此書配者誰請君摹取浯溪石上中興碑

贈瘍醫宣氏

長橋下壓蛟龍宮岸上人家如鏡中道人賣藥臨溪水醫  
得青蛇是龍子報恩不受千金珠龍伯親傳海上書門前  
扶杖人如市妙術何愁三折臂燕支山前白草秋冷入金  
瘡淚欲流安得神丹從爾乞提携玉龍還向敵

題趙彥徵畫葵軒歌爲金修撰賦

昔君種葵吳門東南風五月花茸茸年年走馬看花去君

家有酒如花紅今君種葵荆山下五月開花還遶舍看花  
對酒豈無人祇憶故人無在者種花人在未成翁何事看  
花人不同我亦當時看花者忽到花前如夢中握君手爲  
君壽但願長看君花酌君酒

驛船來

驛船來鼓如雷前船去後船催前船後船何敢住鋪陳惡  
時逢彼怒畫屏繡褥紅璫瑜春夢漸醒過船去棹郎長跪  
勸使臣願官莫喜更莫嗔古來天地如郵傳送盡勞勞無  
限人

梅花初月樓歌

吾聞仙人好樓居乃在閩風之圃元洲之墟雲窓霧閣千

何表青天十二金芙蓉風舟不可以逕度安能跨海騎鯨  
魚新安先生列仙儒卜居半生茅未誅曉携青鹿向煙霧  
一逕初入千縈紆桃源忽向眼中見風物但是秦人餘五  
丁何年斧鑿樞洞戶夾立宁平舒紛紛過客不敢有山君  
守護煩呵噓先生結樓萬木杪迥如麗譙雄且孤連峰忽  
斷西南隅開樓見月蛾眉初梅花千樹雪不如飛觴醉月  
弄花影炯然身墮白玉壺侍郎結髮讀父書十年閉樓山  
不看一朝微起青雲衢珮玉日向君門趨樓前梅花白開  
落樓頭明月還盈虛南窓孤獨照歸夢覺來枕席非吾廬  
且當致身佐唐虞夔龍豈容混樵漁長干美酒熟可沽梅  
花如雪覆綠蕪神州月色天下殊何用區區懷故都花間

臥月紅璿瑜人生花月何處無

題錢舜舉溪岸圖

憶昔至元全盛日天子詔下徵遺逸吳興八俊皆奇才秀  
郎王孫稱第一一朝玉馬朝周去諸子聲名總輝赫豈知  
錢郎節獨苦老作畫師頭雪白江南沒骨傳者稀錢郎得  
之法更奇晴窓點染弄顏色得錢沽酒不復疑今人祇知  
重花鳥豈識此圖奪天巧元雲抱石雷雨垂蒼山夾水龍  
蛇遶岸側溪迴共杳冥蒲稗深沉映魚鳥漁舟乍隨遠煙  
散客子竟渡澄江曉白云布置師北苑只恐庸工未深了  
卷餘更有魏公題字擬鍾王差未老鄭侯得之恐神受使  
我一見喜絕倒雙溪流水清何極門外南山空黛色文章

翰墨何代無二子疇能躡其跡爲君題詩三歎息嗚呼古人難再得

長洲行送黃茂宰之官長洲

昔我揚帆向東海弔古直上姑蘇臺洞庭水樹淨如髮一片吳江天際來長洲逶迤覆綠水金沙蕩漾明光起不見夫差蕩漿歸空有芙蓉似西子閶門大道多酒樓美人如雪樓上頭爭唱吳歌送吳酒玉盤纖手進冰羞勸人但飲不須愁伍員吹簫去國成名鴟夷一舸流恨無聲要離已矣高墳崢嶸樵兒躑躅芳草春生何如三讓人孤名如水清亦有掛劍翁生死見交情薄俗輕然諾乾坤長戰爭兩賢不可作令我淚沾纓君發金陵臘未殘君到吳門春已

還邑人訟少清且閒還同謝眺看青山開元寺裏題詩處  
訪我舊壘蒼苔閒倘過皋橋煩借問恐有高人梁伯鸞

題邱大卿天柱峰

昔聞安期生飄飄入秦京上書三月初報罷拂袖去作蓮  
萊行却笑叔孫過俯仰咸陽城長生亦何補身後留空名  
何侶長安少年客天柱峯頭煮白石朝辭猿鶴下雲中莫  
逐夔龍侍君側繡衣騎驄馬蹀躞臺城下愛道心不忘歸  
來坐清夜太平天子親齋祭新擢祠官捧珪幣紫壇燿火  
曉如星獨倚袞衣朝上帝翻思舊隱地石室生青苔來時  
壁上蒼精劍七星剝落空塵埃丹砂不復化羅衣誰更裁  
人生窮達會有命何須千歲如童孩草衣未食苦復苦王

喬偉佺安在哉寄語空山舊泉石不須爲我生悲哀功成  
倘遂乞身願萬里青天騎鳳來

題赤城霞圖贈方生

結髮好名山遨遊到吳楚東遊不到天台路長憶興公賦  
中語赤城煥高霞翩然空中舉靈溪碧草春萋萋瀑水和  
風響秋雨我欲振金策飄飄凌九垓游神不死庭迴聽增  
天臺手招丹邱人共臥石上苔紅顏去人不願返老大求  
仙嗟已晚生方去愁人心贈生赤城圖吟我赤城吟勞勞  
亭下一杯酒離愁萬里生林陰客車明日當早發雲帆孤  
飛度東越國清寺前千尺松歲晚應歸望山雪道逢寒山  
子爲寄相思情未絕山人若欲知我心五界峰頭看明月



奉化李公復祖母沈年二十生子七月而寡子既長  
沈爲娶兄之女爲婦生二子亦寡長公達次卽公復  
二母今皆已老號雙節堂

鳳背鸞膠難續絃雙龍鏡破難再圓阿婆二十已守節新  
婦喪夫方少年大兒嬌啼母心苦小兒十月安知父破窻  
風雨來早秋夜續燈前共相語山頭松栢摧爲薪山前翁  
仲總成塵紅顏憔悴垂白髮生死不慚泉下人

百索詞

越羅窄袖香如雪五色絲茸相關結看誰結得絲最長管  
取自身無口舌大姑巧擘松紋細小姑雙盤作人字直來  
只依金釧寬賸得留將繫郎臂繫郎臂結郎心一寸絲繩

一寸金愛惜莫教容易斷直到明年與郎換

吳宮詞擬王建題胡廷暉所畫春景樓觀士女圖

館娃宮中百花開西施曉上姑蘇臺霞裾翠袂當空舉身  
輕似欲隨風去遙望三江水一杯雨點微波洞庭樹轉面  
凝眸未肯回要見君王射麋處城頭落日欲棲鴉下臺戲  
折棠梨花隔岸行人莫偷盼千將莫邪光燦燦

楚宮詞擬張籍題夏景

渚宮四面芙蓉開碧水晴涇冰井臺玉壺蔗漿光滿滿當  
畫君王頻賜來雲綃半卷涼衾滑援琴向風彈白雪冷玉  
屏風十指寒輸却鸞篋戲相奪吳綾畫扇鎮長新肯信年  
年有炎熱不願生入蓬萊峰願妾世世居王宮

秦宮詞擬李賀題秋景

涼波翠濕南山影  
露滴金人光炯炯  
秦王夜半卷衣回  
樓壁斜開蜀雲冷  
西宮桂熟離離子  
海童不歸一塵起  
蛄啼老石不勝秋  
小玉弄香惜香死  
胭脂影破澄潭白  
菱角尖尖不堪摘  
鮮紅嫩綠未滿船  
樓前涼兔光團團

漢宮詞擬溫庭筠題冬景

石鯨呿浪搖金池  
吹盡宮梅如雪枝  
避風臺高風不到  
寶帳熟眠人未知  
象爐紅熾狻猊影  
氍毹軟翠鴛鴦並  
李娘喚春春爲回  
笑却人間求火井  
椒房小妓起常先  
玉餅暖手濯溫泉  
白頭臣朔寒無履  
待詔金門霜滿天

送金秀才歸侍

風吹歷陽樹石城悲早秋高堂入遠夢拂袖登吳舟金陵  
官酒如乳香酌君送君朱雀航前日同來二三伴此時望  
君俱斷腸科名古來人未美富貴不如歸故鄉年年隨計  
多辛苦十上風塵竟何補秋卷空將篋內歸彩衣重着階  
前舞當時縣令親勸行今日還家父老迎門外清溪仍可  
釣山下石田身自耕子自長健親長在黃金如山不可買  
君不見長安城中罷官客欲作布衣何可得

吳節婦詞

赤塵曉擁青絲騎玉鏡愁鸞落紅淚冰魂偷逐水仙歸綺  
樓一夜靈犀碎六曲闌空不碍春帶羅盤鳳輕颺塵池波  
不動暮光碧青天影落桃花雲相思月照樓前水離離芳

樹留紅子無情桃李亂中開不學芙蓉抱霜死

守宮詞

細合和丹食龍子臙脂夜凝神血紫老蟾玉杵寒丁東鸞  
尾輕輕飛碎紅織成窮袴千盤帶蝶粉蜂黃鎮長在天桃  
一點老晴春門前魚目深如海

題金華王氏潔養堂

金華之山何嵒巖上有樓觀當雲霄仙人時跨綵鸞下夜  
靜月明吹玉簫丹厓翠壁饒煙霧正是初平牧羊處初平  
一去已千春白石于今尚如故君因采藥偶經過嫋嫋涼  
飈生薜蘿洞口雨餘蒼蘚合松間秋晚白雲多幽徑閒行  
不辭遠泠泠碧澗流常滿赤松來往此巖中曾見蓬萊幾

清淺有時高咏獨歸來迴看明月上仙臺瑤草無聲露華  
濕天風吹袖吟懷開聞道君家景殊絕南圃有花如白雪  
兄弟相規侍母前兒身常比花同潔花謝花開春復秋悠  
悠世事隨東流惟有高堂風物在開門長對南山幽八珍  
美味非所欲菽水奉親歡不足但願棲遲勿遠遊歲歲相  
依在林麓君不見西家輕薄兒身隨賈客游天涯挂帆東  
去入滄海風濤洶湧無歸期又不見南鄰少年游俠客遙  
遙征馬天西極幾時販得黃金歸愁來應灑窮途泣人生  
忠孝當兩全事親且復終天年還須奮身佐明主留取聲  
名照千古

園中懷全許二校書

市朝非我戀此地養疎慵園古苔連竹窓明雪在松素帷  
生道意清鏡長衰容不見羊求過空尋舊屐蹤

寄周伯陽

薄宦志多違言歸未得歸一隨江燕去五見塞鴻飛素髮  
應添鏡緇塵已滿衣裁詩擬相寄人到秣陵稀

寄金子敬

束髮事邊庭瑠弓白羽翎老知農有味病惡藥無靈爲客  
荒三徑教兒誦五經定應琴酒罷餘興到丹青

懷故妻及亡兒二首

時在姑蘇  
園城中

故妻及稚子墓俱在吳興每歲常一展省風塵阻  
絕泣然興懷因賦短詩用寄哀悰

何處葬深情牽車出曉城  
豕間無白日鏡裏是前生  
積壤銷釵鳳荒苔掩珮瓊  
空餘故衣在手迹尙分明  
埋骨近蓮宮松杉滿逕風  
明珠辭掌上白璧毀泉中  
卷有塗鴉墨花迷趁蝶叢  
傷心贏得博者此恨詎能同

憇桃花園

古巷號桃花茅簷背竹斜  
賣蔬供北郭放水與西家  
土脈通潮信湖光助物華  
我來思借地學種五文瓜

九日過東園

雲日弄秋暉元齋坐掩扉  
草芳寒蝶戀竹靜午禽飛  
雅會便詩侶閒行稱道衣  
若教鄰近住爭遣往來稀

樓中雪意



樓角聚寒鴉江氛掩晚霞亂雲方似葉凍雨未成花天意  
憐貧士人情向酒家愧無梁苑賦空擬詠瑤華

陪明天目會方員外東園

柴門連水竹車馬少曾通人臥春寒裡僧來暮雨中醉看  
新柳色吟對落花風何用談名迹余生已悟空

元夕錢塘懷古

聞說蕭朝事今宵畫日同都人丹闕下天子綵樓中燈燄  
千枝月衣香百和風墜鈿隨步拾遊騎徹明通節物長生  
在豪華逝水空無因見遺老重問古行宮

吳興南門懷古

郭門南面似襄州野樹寒山對倚樓公子城空無食客霸

王宅壞有荒邱夕陽冉冉仍西下秋水茫茫共北流只是  
今時已惆悵不應更爲昔人愁

僧齋寒夜

上方臺殿駐餘暉露下煙寒獨掩扉山木蕭條啼鳥歇道  
門清淨俗人稀鐘兼遠籟回鄉夢鴈帶新涼到客衣擬結  
許詢同下榻自憐幽興每相違

行藥過西崦

白日都銷筆硯閒偶因行藥到松關秋聲不盡蕭蕭樹夕  
景無多淡淡山蟲響寒齋僧自定苔荒深院客長閒已知  
身世俱成幻莫歎西風鬢易斑

揚州道中

馬頭津口足風波歲宴遙乘一傳過南渡客來多漢語下  
江船去半吳歌燕城總入新編戶瓜步斜連古漕河何處  
吹簫明月夜野田茅屋曉煙多

曉過淮陰

軍城鐵鎖曉開關使節星馳未敢閒淮水東流應落海瓜  
州北去少逢山行人欲斷寒煙外遠燒時明亂葦間却憶  
帝城風物盛禮成須復上春還

寄南屏澗長老

蒲室傳心第一宗老尋古刹寄行蹤貫花偈就人傳寫壞  
色衣穿自懶縫案上金經皆貝葉手中玉塵是青松何年  
惠遠重開社來聽東林寺裏鐘

送胡宗禹之播州驛丞

便路之官暫到家九溪窮處是天涯  
夜郎沙暖多龍跡槃瓠山迴似犬牙  
浦口勞歌催畫鷁門前使節詠皇華  
途中定有江行葉好寄東風萬里槎

寄王止仲高季廸

祇恨孤城未解圍  
圍開翻遣別相知  
夕陽江上匆匆酒  
細雨燈前草草詩  
有夢直從花落後  
無書空過鴈來時  
郭西古寺題名處  
今日重遊却共誰

題故秀才陳哲手抄杜詩

世間無藥補清羸  
身死雙親却倚誰  
少婦寫藏臨沒語  
故人收得舊編詩  
空窓夜漏沾書檢  
壞壁秋塵落硯池  
須信

才名天所忌後生休更擅文詞

重陽道院

玉洞泉香草自春丹樓南下瞰城闌青衣童子曾來地白石先生過去身九轉爐寒銷宿火七真堂古鎖秋塵松間道士多凡骨未省誰爲出世人

送劉孝廉入蜀

長亭把酒唱離歌別路迢迢奈爾何淮水東來吳地盡函關西去蜀山多秦宮萬井生禾黍漢闕千門長薜蘿勸子慎須崇令德莫將功業更蹉跎

題萱

佳人重生男競墮宜男草東鄰有嬌婦對花空自老

獵騎圖

弓劍隨身帶，閑支細馬馱。天寒水草遠，更過白狼河。

蘇公堤

冷落百花朝，無人上畫橋。東風吹綠草，依舊舞裙腰。

寺所書所見

修廓行復怯，風吹合歡帶。小立避遊人，佯對香爐拜。

月潭試茶

乞火從山婦，臨流煮澗芳。怪來泉味好，併帶落花香。

悼高啟

燈前把酒淚雙垂，妻子驚看那得知。江上故人身已死，篋

中尋着寄來詩。

消息初傳信又疑君亡誰復可言詩中郎有女今痴小遺  
藥千篇付與誰

生平意氣竟何爲無祿無田最可悲賴有聲名消不得漢  
家樂府盛唐詩

挽楊基

恨不尋君未死前須與離別便千年慰人幸有童烏在他  
日應能續太元

暮過西崦

白水泱泱遠壞堤隔林遙聽夕陽鷄聞行每到東邊少爲  
有青山在屋西

夢中賦

西施江上采荷花張蓋如雲萬扇遮如今不敢人窺著昔  
日人看監若耶

聽老人琵琶

老來絃索久相違心事雖存指下微莫更重彈白翎雀如  
今座上北人稀

最勝亭感舊

絲雨微消紫陌塵湖光冷落似無春朱門記得曾來處揚  
柳青青不見人

舟中聞歌

何處清歌短更長渚風沙雨共淒涼不須真向天涯聽一  
日辭家已斷腸



懷黃野得

疎散元非用世才  
日高林戶尙慵開  
爲憐湖上青山好  
行到冬青樹底來

題徐黃畫南浦亭圖

離離煙樹接通津  
南浦亭前碧草春  
客裏見圖先淚落  
只緣身是此鄉人

春初遊戴山

雲羅橫四海田野無遺英  
尙賴二三子共怡山水情  
煦煦新陽動寥寥天宇清  
昔人稱四美茲晨遂成并  
前登高邱阻遙睇澄湖明  
憑林招遠風松檜自成聲  
俛仰天地間微軀良不輕  
安能自羈束坐使衆累縈  
處賤足爲貴抱素詎

非榮逍遙解神慮庶以適吾生

春山瑞靄圖

鶯啼山雨歇前川綠正繇人家在深樹雞犬晝無喧澹澹  
流水意依依田父言謾鼓木蘭楫往溯桃花源卽此堪結  
廬可以做華軒

擬過園隱阻雨

在遠每傷離在近還成隔飛雨渺無涯佳期悵難得人寒  
市井空天晚江湖白知君掩閣臥終朝遲來客

倪元鎮畫竹沈御史所藏

雲林之子有仙骨平生好潔如好色紛紛濁士等沙蟲鳴  
呼瓚也何由得憶昔常登清閼堂鵲尾爐熱龍涎香紹京

妙墨僭繇畫示我不啻千明璫人間萬事如飛電洗玉池  
空人不見季子城東土一坏何人爲著黔婁傳繡衣使者  
騎青驄曾聽竹枝湘水東歸來見此若夢寐巴陵洞庭生  
眼中江湖豪翰今零落君得此圖良勿薄媿我題詩憶故  
人黃鶴孤飛下寥廓

胡廷暉畫

畫師我識吳興胡身長八尺蒼髯須目光至老炯不枯藻  
繪萬象窮鎔銖大兒十歲能操觚小兒五歲能含朱得錢  
但供酒家需時復縱博爲歡娛魏公家藏摘瓜圖妙筆豈  
翅千明珠胡一見之神頓蘇以指畫肚潛臨摹落筆便與  
前人俱祝融撐空閣道孤朝雲暮雨相縈紆中天碧瓦仙

人廬下有桃源風景殊，雖犬似是先秦餘。  
潯陽野客山澤驪，自從喪亂遭窮塗。  
幸逢治世容微軀，堯舜亦有巢由徒。  
已辦小艇長鬚奴，便欲往從漁父漁江湖。  
此境何地無？

莘叔耕畫梅雪軒

自注：叔耕名野世，居湖州蓮花莊。

好畫誰如莘棗強，墮馬折肱猶未忘。  
何年寫此寒林趣，精絕未數左手王。  
屋裡何人坐吹笛，似是南昌郡中客。  
曲終朔雪忽飛來，開門滿樹梅花白。

贈琴士

有客夜半來山中，橫琴坐石彈松風。  
松風曲罷抱琴去，落月一聲天外鴻。

寄天目山雍長老

天目之山青岩堯道人縛屋青山椒白雲出山不歸去春  
風吹老黃精苗

燕山春暮

金水橋邊蜀鳥啼玉泉山下柳花飛江南江北三千里愁  
絕春歸客未歸

張率

率字孟循廣信人元季以詩名江右與張仲舉黃  
君瑞危太樸相頡頏吳元年徵知嘉定州有張嘉  
定集

淙陂山

飛瀨淙淙觸澗流十年重上此山遊林花過眼愁紅雨泉

石迎人笑白頭迥隔世緣千嶂合盡收風景一亭幽纓塵  
此日無堪濯隨處滄浪看飲牛

芙蓉峯東方方壺

芙蓉千仞晚岩巖風捲層雲次第消雪樹近天微點染雲  
衣拂石故飄颻玉山寒氣高相竝紫閣孤標迥不招欲得  
壺山飛綵筆憑誰蛟室取水綃

送鴻墩

我有千古意寂寥無與論故人久不見幽尋山下墩木落  
陽鳥至秋風起平原升高寫遠思素琴斯一援去翼何所  
止青冥自飛翻水絃韻流水樂此邱中園彼美嵇中散鳳  
鳴起朝瞰心閒手亦敏超謝外物煩鼓瑟洙泗上聚星元

聖門希聲吐遜志夙異三子言聖喟邈已遠高懷良可嘆  
斯文墜地久延咏太古渾曠達子所尙神情周八垠歛之  
秋毫末攬袂游羲軒

梅雪堂

柯根見生意乘春發芳葩朔風捲銀漢潤澤沾枯槎清光  
互相掩瑩潔無纖瑕虛室自生白至素良足嘉開堂聯清  
賞志士薄榮華承吾保貞固清節明天家

奉題司空廟并簡鄒縣令元方宰

去冬還自海雲邊道出司空古廟前高棟已隨兵燹化故  
基還與草花連薛苔碧色文章石霧雨黃昏祭祀田吳陋  
洞陰留野雪徐君巖下有通川百家桑柘全非舊數樹梅

花絕可憐華髮下車逢暮節青山過武自童年死當廟食  
奇男志生也尊榮信史傳公族世家東魯望郡侯始祖睦  
州遷掌平水土周官任綏靜邊疆漢將權制誥有神曾錫  
命子孫餘澤尚多賢註書隱士龍終臥出宰郎官鳳試鸞  
鄒縣政成如告考奉先從此立修椽

錢塘懷古

南渡諸陵玉柙灰錢塘孤塔是幽臺石麟久向雲根沒金  
雁何曾海上回掘漢赤眉因世亂賓周白馬自天來沛中  
王氣非陵寢徒使遺民過客哀

兵後次衢州

高壁深池表裏寬危樓飛閣水雲寒三年血戰曾漂杵兩



將身降惜蓋棺桑土盡如東郡賦橘林猶帶洞庭酸羣雄  
政似柯山奕閑與樵夫縮手看

乙巳元日

四門擊柝罷寒更淮水淮山欲曙城柏子添香延宿火梅  
花吹角送春聲大星賓日光芒定殘雪兼霜物候明故國  
親朋俱獻歲異鄉魚鳥獨關情

荅周檢校

衡茅晚計卜溪南水石幽期得縱探詩社往來青玉案仙  
經借送紫泥函漁村過雨行秋霽龍洞開雲坐晚嵐種樹  
書成嗟已老煩君多致洞庭柑

甘藟

瑾字彥初臨川人元末與張仲舉張可立甘克敬  
善有詩名明初官嚴州同知有集

題何梅閣山居

迹不到城市逢人無厚顏一瓢風外樹雙屐雨中山流水  
春喧碓歸雲暮掩關憂時心未已祇益鬢毛斑

題張氏竹園別業

避難疎狂客長貧少定居采芝空有曲種樹豈無書擬製  
東山屐看馳下澤車肯容疎嬾迹來與狎樵漁

梅溪宿徐橘隱者寓舍別後記謝

不見故人久吟愁入鬢絲試呼村舍釀細論草堂詩夜雨  
西窗燭春風別墅棋滄洲如有約歲晚共襟期

讀文丞相傳

萬里冰天泣楚冠南雲歸計路漫漫尚圖一旅興王易不  
念孤兒立國難樓櫓海門西日暗劒歌江介朔風寒九原  
負痛遺編在朔雪殘燈掩淚看

水南晚眺

山風蕭蕭羣木落寒日黯黯孤雲低江雲欲雨復不雨野  
鳥將棲還未棲歸人入夜望煙火行子傷秋聞鼓鼙水南  
山川遶城市正好買地躬耕犁

社日

楓樹雲邊雨脚斜兒童祈賽競喧譁雞豚上戊家家酒鶯  
燕東風處處花野徑歸時扶醉客叢祠祭罷集神鴉瀕湖

生意傷多潦，預祝汙邪載滿車。

寄張可立

旅泊他鄉有歲年，南塘水竹卜居偏。  
得錢日閉君平肆，載酒秋尋賀監船。  
葦近通門底，巷荆榛遙帶郭西田。  
東歸亦有蓴鱸興，矯首滄浪若箇邊。

西師

中興實藉羣公力，反正終歸萬姓心。  
霧雨銅標蠻徼闊，山河鐵券漢恩深。  
明珠翡翠殊方入，天馬蒲萄遠使臨。  
北極卽瞻佳麗氣，南雲足聽凱歌音。

雨中書懷

南窗坐掩殘書落，盡梨花雨點疎。  
短夢或因中酒後，輕

寒已過禁煙餘芹香墮几初歸燕泉脈通池欲上魚搔首  
故人懷別久欲憑尺素問何如

送防秋將

玉帳秋風動邊塵颯颯驚射鵰輕漢將牧馬過秦城白草  
交河道清笳捕虜營戰裝宜卽換已及早寒生

寄張雪坡

南塘水竹舊郊扉老去青山目力微吟瘦定知衣帶緩別  
多兼恨簡書稀畦桑葉短蠶初出隴麥苗深雉正飛香老  
松花春又過莫令情分久相違

寓舍偶題

四海戎麾滿中原汗馬疲龍蛇傷紀歲麟鳳嘆非時土貢

包茅廢邊防羽檄馳杜陵憂國念釋悶強裁詩

題高伯昌遠遊卷

九月朔方城河流已涸凝氊車馳犯雪乳碗飲兼冰汗血  
宛西馬竒毛代北鷹良材資國用翹首卽飛騰

秋閨怨

惆悵下簾鉤庭空月影流錦衾成獨旦羅扇覺先秋火熟  
薰籠煖泉寒汲綆脩祇憐雲際雁傳得玉關愁

公孫

躍馬公孫氏荆湖舊拓疆函書鄰好絕陸駁霸圖荒城堞  
迷秋草樓船散夕陽龍文成五采終古在芒碭

贈人戍襄陽

漢水荒城外頻年汗馬場  
舟車通饋餉部曲雜耕桑  
幕府文書暇烽樓警邏長  
山公有愛將日醉習池旁

龍虎沖虛張真人遊仙詩

世業神明裔朝家禮秩優  
祝釐宣室夜賜曲鑑湖秋  
海月虛瑤席天風駟玉虬  
谷神應不死獨與化爲謀

默觀元化運乘彼白雲歸  
廣野悲張樂青山笑拂衣  
玉棺天上葬神劔斗間飛  
圭組褒崇舊宜看奕葉輝

讀靖康遺事

杜鵑啼老洛城東烽火郊畿縱  
犬戎廟略合收淝水捷敵  
盟誰定渭橋功銅駝故陌迷  
芳草黃屋驚塵捲朔風一白  
鼎湖龍去後小臣何地泣遺弓

讀史有感

三龍悵望杳東游  
弓劒蒼茫滿地愁  
青草空遺雙塚月  
彩雲已散六宮秋  
長江落日忠臣恨  
易水寒風壯士羞  
楚漢興亡俱一夢  
當時何用割鴻溝

汴流西繞漢時宮  
陵樹蕭蕭易朔風  
金盃不冰銀雁去  
銅仙無露玉盤空  
御溝流水人間碧  
禁苑蟠桃海上紅  
却憶晉家南渡客  
清談不記誤和戎

題余忠宣公請援兵書卷後

大將分符自朔庭  
出師江漢肅南征  
賀蘭不救睢陽厄  
無忌難收鄴下兵  
唇齒百年誰復恤  
簡書千里漫多情  
西風一劒英雄淚  
已逐寒江日夜聲



錢塘懷古

落木驚波入戰塵  
新亭空集北來人  
神州未復英雄老  
王業偏安歷數屯  
萬騎星屯潮捲夕  
六宮雲散草生春  
百年江左偷安計  
泉下惟應泣老臣

咸洛腥羶幾百州  
中原誰切祖生憂  
秦關壁使星馳夕  
漢苑銅仙露泣秋  
萬死奸諛和敵計  
百年臣子戴天讐  
欲從故老詢遺事  
斗酒難澆磊砢愁

閑居感舊

四牡橫奔馭者誰  
委銜無乃昧先幾  
廉頗不念私讐後  
問鞅纔知首法非  
漢業幾年專仗鉞  
楚歌中夜竟沾衣  
可憐日晏蓬萊殿  
目斷南雲奏凱歸

待詔金門擁佩珂南征殊賜洽謳歌亦知江總蒙恩數每  
愧楊雄識字多頭白一官今自老汗青千載竟誰磨可憐  
夢裏釣天山回首蓬萊奈爾何

過龍虎山

素書一束展經綸世業留侯異等倫紫府羣仙天上籍碧  
桃流水洞中春吹簫嬴女臺留鳳送酒麻姑脯擘鱗看取  
步虛朝帝所夜闌飛佩近星辰

遊龍虎山

流水灣迴路百盤化人樓閣倚清寒枕中鴻寶長生錄屋  
外元都太古壇金鼎有丹先試犬玉簫無曲不吹鸞麻姑  
采老秋霜鬢幾見扶桑海未乾

寄馬彥會

百戰孤城血未乾故人書札報平安  
秋風代馬思燕草夜月湘歌怨澧蘭  
萬里江湖仍旅食百年天地白儒冠  
山陰更有誅茅地仗劍休辭行路難

高子勉病起移家

四郊無警被桑麻洙水源頭舊是家  
愛客屢懸高士榻開荒寧種故侯瓜  
酒邊病減知弓影燈下歌長拂劒花  
閒却陣圖雲鳥勢看山隨處岸烏紗

題洞泉觀

流水橫橋小洞門亂來遺跡暗消魂  
劒沉舊井龍湫廢碑斷陰崖鶴塚存  
落日樵蘇歸古道西風禾黍入孤村  
扶桑

海水今清淺應待麻姑爲細論

春日登高有懷

風景蒼茫大野陰懷鄉倦客此登臨十年魚雁將家遠三月鶯花濺淚深天落湖山雲水散地連閩粵瘴烟侵躬耕却憶窮廬叟梁甫栖栖日暮吟

清明

輕寒天氣半晴時隴麥畦桑綠漸肥誰與試煙傳蠟燭且謀沽酒典春衣東風門巷桐花落流水池塘燕子飛吟罷不堪搔短髮杜鵑祇解促春歸

贈地理者

囊中一卷郭生書眼底山川興不孤兩袂風塵誰故舊一

筇煙雨自江湖銅駝陌上人長笑金粟堆前鳥自呼見說  
五陵佳麗氣天荒地老不能蕪

讀余廷心傳

海風吹浪集樓船百戰疲兵僅數千但許有身堪報國豈  
知無力可回天幽燕北望王師遠江漢南來地勢偏天塹  
已空豪傑沒朔雲邊雪事茫然

次張文學韻寄涂貢士

畫角城頭曲未終十年哀怨萬方同黍離正恨傷周切章  
甫翻憐適越窮黃葉空山僧舍雨滄浪衰鬢釣絲風閑愁  
欲遣三千斛濁酒寧辭一百筒

長沙夾夜泊

漠漠蒹葭斷渚連烽亭亭鼓報更傳迴風吹樹纜初繫斜  
月照逢人未眠雁足寄書懷歲晏蟹螯新酒及霜前蒼茫  
遠浦寒燈外尚有漁郎夜扣舷

登擬峴臺

高臺俯仰大江馳南盡甌閩樹影微白草秋煙遺戰骨青  
天寒照落人衣襄陽耆舊心如昨華表仙翁事卽非東望  
故園三百里不堪搔首片雲飛

江西詩徵卷四十一